

ASO GAFUA, 22 IUNI 2015

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA O MALIU

Na faasilasila e le Fofoga Fetalai le tuumalo o le Afioga TOOMALATAI Lauvai II, o se tasi o tamalii sa avea ma sui usufono o le Palemene i tausaga ua mavae, i le masina o Iuni 2015 le Afioga TOOMALATAI Lauvai II.

O TOOMALATAI Lauvai II sa filifilia i le aso 17 Mati 1995 e avea ma sui usufono o le Itumalo Faaalaalafaga o Aleipata Itupa i Luga. Sa faatautoina o ia i le aso 30 Me 1995.

O ia o se sui usufono o le Vaega Faaupufai a le HRPP.

Ia avea ia o Au e fai ma sui o lenei Palemene e molimoli atu ai faamafanafanaga ma faamaisega i le tuumalo, le faletua ma le nofo a alo faanoanoa, faapea le mamalu o aiga alii ona o le motusia o le mafutaga ma le Tama.

Na tutulai filemu le Maota mo le minute e tasi e faailoa ai lo latou faaaloalo i le sui usufono ua tuumalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ia e talitonu o lea ua tatou taunuu nei ua tatou alaala i malae matagofie, ae tatou maimoa i Taumeasina e pei o upu i le fale vaifanua o le fale Vaimauga. Ua tatou mimusa foi i lenei taeao fou ma le taeao ula i le alofa ma le agalelei o le tatou Tapaau Sili i le lagi, o lo o tausia pea lo tatou ola ma lo tatou soifua maua i Lona alofa tunoa. Ua tatou feiloai ai i lenei taeao fou i vaelupemaua ae le o vaelupesaa, e tumau pea Lona viiga ia ia te Ia nei ma le faamanu e oo i le faavavau.

E manatu foi e ui ina tatou feagai ma le ao pogisa ona o le tuua o le malo i nisi o e o lo o auuana ma sa auuana foi i le tatou Palemene i fatia ua sola ma aso ua alu, ae talitonu o lo o pai mai pea le Agaga faamafanafana o le Atua i le tatou folauga.

Ia e fai ai pea le agaga ma le leo vaivai e momoli atu ai le faafetai tele i le alafai mai i faguga lelei i le paia ma le mamalu o le tatou Palemene i lenei aso, viia pea le Atua ona o Lona alofa tunoa ua mafai ai pea ona tatou toe fesilafai i lenei taeao fou, e tatou te le iloa ala a le fili ma mailei, a o lenei taeao o lenei ua tatou aofaga potopoto i Lona alofa ma Lona agalelei faaauau pea ua tatou maua ai lenei taeao ula ma le taeao manuia.

E faafeiloai atu ai i lau Afioga i le Palemia ma lau Kapeneta, lau Afioga i le Taitai o le Itu Agai ma le Sui Taitai ma sui usufono mamalu uma o le tatou Palemene. Malo le soifua. Sa tatou feagai ai ma faiga malologa ia ma tatou faalogologo foi i le upu folafola i le aso ananafi, ia tatou tausisia measina ma mea silisili a le au ao sinasina, o le matua lena o le tatou Ttusi Faitauaso.

Ia alo maia le paia ma le mamalu o le tatou Palemene, e talitonu le faamoemoe sa tatou tolopo mai i le aso ananafi i le tatou malologa sa feagai ai i le la Aso Faraile na tuana'i atu, o lenei ua tatou aofaga potopoto ona o le faaauauina o le tatou galuega. E i ai le manatu, ia ua lava tapena a outou Afioga i sui usufono.

O le taimi ua sola foi sa tau faatutugata le tatou Maota ona o le faaiuga o le vaiaso, e manatu o lea ua maua lo outou faasiliga malosi e ala i le malologa sa feagai ai, o le amataga lenei o le vaiaso fou, e manatu o le a sologa lelei mea uma o le tatou Fono.

Ou te faapai atu foi i le tapuaiga a Samoa i le atunuu, malo le onosai ma le faapalepale, faafetai le galulue, o lo o outou tui pea le mulipapaga ma outou tapuaia faiva a lou Palemene, e leai so matou masalosalo i se mea e tasi. O lo o pai mai pea le mana ma le faamafanafanaga o la outou tatalo lelea i le Aufaigaluega Paia a le Atua, ia o le a alo lou Palemene i lenei aso ma fuafuaga. Ia manuia lo outou alofaiva i feau ma tiute, aemaise le tauavagameaina o le tauaveina o le tagata ma lana pito maea e toso, ina ia sologa lelei le tautuaina o le tatou atunuu i ona vaega uma.

Ia e talitonu le faamoemoe o lea ua tatou taunuu i le tatou galuega masani.

**TULAFONO TAU FAAOFI O LE FAATATAUINA O TUPE
FAAOPOPO (NU. 2) 2014/2015 MA LE TULAFONO TAU FAAOFI O
LE FAATATAUINA O TUPE 2015/2016 - felafolafoaiga faaauau i luga o
le faitauga faalua - Aso 2**

FOFOGA FETALAI: O lea o le a tatou sagai atu loa mo le faaauauina o saunoaga a sui usufono i tulaga tau tamaoiga o tupe a Samoa faapea faiga faavae tau tupe a le Malo, e ala i le faitauina faalua o le Tulafono Tau Faaofi e pei ona amata mai i le aso Fono talu ai.

E tolopo a tatou galuega i le aso Fono i le vaiaso talu ai ua maea ona saunoa se tasi o sui usufono mo Falealili, Tofa Tusa Misi Tupuola, ma o lea ua avanoa le Maota mo se sui usufono e fia saunoa i lenei taeao.

Ia o lea ua maua atu ua tulai mai se tasi o sui usufono o le Fale Vaimauga Sisifo, le Tofa Lefau Harry Schuster, ua avanoa le Maota mo le saunoaga.

Tofa LEFAU HARRY SCHUSTER (Vaimauga Sisifo): Faafetai i lau Afioga i le Fofoga Fetalai mo le avanoa, e faatalofa atu i lau Afioga i lenei taeao matagofie ma le manaia ua tatou maua i le alofa ma le agalelei o le Silisiliese.

E faafeiloai atu foi i le Afioga i le Palemia ma le Sui Palemia ma le mamalu i le Kapeneta, le Susuga i le Taitai o le Itu Agai ma le Sui Taitai ma sui usufono mamalu uma o le Fono, le Failautusi o le Fono ma le mamalu o le Ofisa, aemaise foi o Ofisa Sili o Matagaluega ma Faalapotopotoga a le Malo ua tatou faatasi i lenei aso. E faatulou atu foi i lau tapuaiga Samoa ae tainane le tapuaiga a lo matou itumalo o Vaimauga Sisifo.

Lau Afioga i le Fofoga Fetalai e tauala atu i lau Afioga, e fia momoli atu e se tasi o sui usufono mo Vaimauga Sisifo le faafetai tele lava i le Afioga i le Palemia ma le Malo aemaise le Minisita mo Galuega, Felauaiga ma Atinae Eeseese. E maitauina i totonu o le Paeai lenei i totonu o le Vaimauga o galuega tetele nei a le Malo o lo o faatinoina i totonu o lo matou itumalo, o le fale Fono lenei o Tui Atua Tupua Tamasese Efi, o le maketi i Fugalei o lea ua toe faaleleia ma faamaualugaina le mea o lo o fau ai, ona o le aafia i lologa i aso ua tea atu, faapea ma le Falemai Tele i Motootua, e ui e faapea o galuega tetele a le Malo mo Samoa atoa, ae ona o lea e i totonu o le Vaimauga, ua tele foi le aoga mo tagata o lo matou itumalo, o lea e momoli atu ai le faafetai tele lava.

Ae i le tulaga tau i auala i le auala lea e alu atu i Apia e tau i Siumu, e tele se vaega o le auala lea i Afiamalu sa aafia i le Afa o Evani - ma o lea foi ua faaalua e tele ai ia vaega, o le auala lea e sau mai Vaitele e tau atu i le magatolu i Malifa, pei o le auala lea e sio e alu atu lava i i i Vaimoso e taamilo atu i Fugalei i Mulinuu, alu atu i totonu o lo matou nuu o Apia ma Matautu e tau atu i Moataa, Vaivase faasolo mai i Magiagi ma le aega lea e i Magiagi lea ua faasima, ia ua faaleleia uma lava ma faalautele uma nei auala i le lima tausaga lea ua tea atu. O auala foi lea e i totonu o Apia e fesootai ma auala nei, ua maea foi ona faalauteleina ma toe faaleleia i galuega a le Malo lea ua tea atu, na ona pau lava nai vaega la e tele i ai, o i i Alamagoto, e lauitiiti le auala ma e leai se mea foi lea e savali ai tamaiti aoga ma le au savavali i taeao, ou te vaai i gauta i Letava i le toe faiga o le mea lea sa leaga ia Evani e toe fai le faiga lea, o le mea lea e i ai le drain o le auala ae fai ai luga le footpath, pei o se faiga lea e aoga mo i i Alamagoto, ae faapena foi la isi vaega i le ui atu i Tanugamanono e tau atu i uta i Afiamalu, o lo o aafia foi i le tulaga lea e lauitiiti lava le va e mafai ai ona feoai ai le au feoai i luga o le auala. Ae momoli atu ai le faafetai tele lava i le Malo mo nei galuega uma, o lea foi ua faatino le taligalu lea ia matou i tai i Matautu ma Vaiala, faafetai tele mo ia galuega sa talosaga atu ai i tausaga e lima ua tea atu faapea foi lou uso a sui usufono le Tofa Lenatai Victor Faafoi Tamapua.

O le aoga ia o lenei ogaeleele e le gata mo le afioaga o Vaiala a o tagata lautele o le tatou atunuu, a e pasi i ina i le 12:00, ia o le toatele ia o le afaigaluega a le Malo ma tagata faigaluega e malolo atu i ai i lea vaega i faiga malologa o le aoauli. O lea e momoli atu ai le faafetai tele i lau Afioga i le Palemia ma le Minisita.

E fia momoli atu foi le faafetai i le Minisita mo Faamasinoga ma Pulega tau Faamasinoga. Ua maitauina i le lipoti a le Ofisa i le tausaga na tea nei, le alualu i luma o le auunaga a le Matagaluega aemaise lava le tulaga lea tau Faamasinoga. O le Faamasinoga Apili, o le tausaga na tea nei e 16 apili na fofogaina, ma sa maua uma faaiuga o Faamasinoga ia - ma e faafetai ai foi i le Minisita ma le Matagaluega, o lea ua faalua i le tausaga ona fai apili pe a tele ia Faamasinoga e fesoasoani tele lea i finauga faale-Tulafono aemaise lava e tasi i le tausaga, ia o le tausaga atoa e faatali lau apili pe a faia sau apili, ae faafetai tele mo lea tulaga ua i ai.

O le Faamasinoga Maualuga, e 589 solitulafono ae 394 ua maea ma fofogaina ma faia faaiuga, o se feeseesega lautele e 749 mataupu na faaulu, ae 281 ua maea ona fofogaina ma maua faaiuga.

O le Faamasinoga Faaitumalo, e 5,597 moliaga na faaulu, ae 3,014 ua maea ona fofogaina ma ua maua foi faaiuga, i feeseeseaiga lautele e 1,575 mataupu

na faaulu, ae 1,078 ua maea ona fofogaina ma faia ona faaiuga. Mo Faamasinoga i Savaii i Faamasinoga Faaitumalo, e 696 moliaga, ae 345 ua maea ona faia faaiuga. Mo feeseeseaiga lautele, e 75 mataupu faaulu ae 56 ua maea ona faia faaiuga. I le faamasinoga fesoasoani i Mulinuu, e 5,560 solitulafono ma tagi na faaulu ae 2,028 ua maea ona faia faaiuga. Mo feeseeseaiga lautele, e 528 mataupu na faaulu ae 310 mataupu ua maea ona faia faaiuga. Mo Tuasivi, e 1,088 moliaga na faaulu ae 574 ua maea ona faia faaiuga. Mo feeseeseaiga lautele, e 58 na faaulu ae 30 ua maea ona faia faaiuga.

Mo Faamasinoga ia o se tasi o Faamasinoga aupito sili ona taua o le Faamasinoga o Fanua ma Suafa, o Apia e 441 mataupu na faaulu ae 285 ua maea ona fofogaina ma faia faaiuga. Mo talosaga toe iloilo, e 121 mataupu ua fofogaina ae 112 mataupu ua maea ona faia faaiuga. Mo apili, na taliaina le 41 apili ae 37 ua maea ona fofogaina ma faia faaiuga.

Mo Tuasivi, e 284 mataupu na faaulu ae 145 ua fofogaina ma faia faaiuga. E 35 talosaga toe iloilo ma e 5 ua maea ona fofogaina ma faia faaiuga. E 20 mataupu na talia mo le toe iloilo o apili, ma e 8 ua maea ona fofogaina ma faia faaiuga. E atagia mai i fuainumera nei ua tele lava le agai i luma o le auaunaga a le Matagaluega o Faamasinoga mai le mea lea sa i ai le faasea a tagata i le umi ona faatali Faamasinoga, umi ona faatali le toe iloilo, umi ona faatali le apili, a o lea ua vave le faasologa, a o lo o i ai pea le faasea lau Afioga i le Fofoga Fetalai i le tulaga lea o le umi ona faatali o le faaiuga a se Faamasino. Ma o le tulaga lea e pau lava po o ai le Faamasino lea e tuai ona fai lana faaiuga.

E i ai setete o Amerika, Iunaitetete, e i ai latou Tulafono e i le va o le 3 agai le 6 masina, e i ai le latou Tulafono lea afai e i ai se Faamasino e le i faia sana faaiuga ae ua sili atu i le taimi lea, ona faasaina loa lea ona toe faia e le Faamasino lea se Faamasinoga. E toe taofi ai foi le taimi o le Faamasino lea, e leai se totogi e maua, seiloga lava e uma uma lava sana faaiuga pe o faaiuga uma lava lea e faatali. O se fautuaga lea lau Afioga, atonu o se auala lea e foia ai le mea lea o le faasea a le atunuu i le faatali mo faaiuga. E i ai foi le tulaga i le Faamasinoga e le gata ina vave ona fofoga le Faamasinoga, ae tatau foi ona vave maua le faaiuga. E pei o le tulaga lea a le vave ona fofogaina le Faamasinoga le vave ona fai le faaiuga, e le o maua e le tagata lana aia lea ia vave ona fofogaina le mataupu ma vave ona maua le faaiuga. E i ai le faaiuga faapea Justice delayed is justice denied. So, o le mea lea e taua ai, ia i ai se suiga i le tulaga lea ina ia vave ona faatali le mamalu o le atunuu i se faaiuga mai se Faamasinoga.

Lau Afioga i le Minisita mo Aoga, e momoli atu le faamalo i lau Afioga ma le Ofisa Sili o Pulega ma le mamalu o le Matagaluega. I fuainumera faamauiina a le Matagaluega mo Fuainumera Faamauiina, o tupulaga e 41,233 ona maitaulia i fuainumera, e 15,133 ua faaiuina aoaoga, o lo o faaauauina pea a latou aoaoga. E na o le 29 e na maua e le i oo faatasi i se aoga, ae le o maua mai la i i pe na alu i se aoga faifeau po o se aoga faapena, ae na pau le mea e le i oo i se aoga. Ma o se fuainumera e tulaga lelei lenei tulaga, ona e i ai isi atunuu e faitau afe tagata e le o i se aoga, e oo lava i atunuu ia e maua fua le aoga, e i ai tagata e le o i se aoga, e ese lava tulaga o le latou siosiomaga. E 16,611 na tuua le aoga ae le i faauuina i aoga maualuluga, le tulaga lea o le vaega 12 ma le vaega 13. E 2,460 na maea lelei aoaoga ma

maua le tusipasi mai le 9,000 lea, e 2,814 na faaauau atu a latou aoga i aoga faa-Iunivesite.

Lau Afioga, o nei faamaumauga e lelei tele mo le tatou atunuu. Na pau lava se manatu vaivai lau Afioga, manatua le folasaga a lau Afioga ma le Matagaluega e faapea, o lea o le a aoga lava le tamaitiiti o le mea lava e aoga ai e alu lava seia tau lava i le tausaga 13, faatoa sau lava i le Iunivesite pe a maea le tausaga 13. O se tulaga lelei tele lea tulaga, aua o le Vaimauga, tasi lea tulaga sa aafia ai aoga i Apia ma le Vaimauga, ona o le vaai foi lea a tagata i tua a omai e aoga i le Vaimauga, e omai e pasi ai suega ma faaauau atu i fafo le aoaoga. A o lea la o le a fai le tulaga lea, o le a faaitiitia foi le... o le a aoga lava tagata o le Vaimauga i totonu o le Vaimauga ma faiaoga foi o le Vaimauga i totonu o le Vaimauga. Na pau se popolega lau Afioga, o le tulaga lea o le maualuga ma le lelei e faatinoina ai e faiaoga mo tamaiti aoga nei. E leai lava se faiaoga e le taumafai i le mea e gata mai ai lona malamalama e aoao ana tamaiti i aoga, a o lea foi tatou te silafia lau Afioga, e i ai lava faiaoga e maualuga le tomai, o i latou nei e toatele e malaga atu i fafo. E le mafai lava ona tatou taofia lea tulaga, ona o le tulaga lava ia faaletagata ola, e sue le mea e ola ai lou aiga ma le nuu, a maua le avanoa e alu i fafo, e alu i fafo.

Ae o totonu foi o Samoa ia, ua tele ai foi le tulaga i aoga a Ekalesia ma aoga a le Malo, o latou faiaoga lea e o atu i aoga tumaoti e i ai le Robert Louis ona e maualuga totogi, ma e faitiaina, o le mea lena e tupu i le olaga. Na pau lava se popolega lau Afioga, ia gatusa, po o fea lava o Samoa e te aoga ai, ia tutusa le maualuga ma le lelei o le faiaoga i totonu o le aoga. Ua ou vaai i le TV a le EFKS i le isi aso, o fai atu ai aoaoga i le Matematika ma le Science. E pei o se tulaga lea e mafai ai ona maua le tulaga lea o le ogatasi o le aoaoga i totonu o Samoa pe a mafai ona faatino faapea i le TV. Ou te iloa e le atoatoa foi aua o lea tatou te iloa e le o soo uma Samoa i le TV ae o se tulaga faapea e fesoasoani i nai faiaoga foi nei e i tua atu o le talafatai i Apia i le faaaogaina o nai tamaiti o la e aoga i nuu i tua. Ma o se manatu vaivai lea lau Afioga.

Lau Afioga i le Sui Palemia ma le Minisita mo Pisinisi Alamanuia ma Leipa, i totonu lava o le Vaimauga o le mea taua lava i totonu o le Vaimauga, o le aoga ma le mea e maua ai le galuega pe a uma le aoga. E fai lava si taugata o le matou itumalo, ona e le tele se eleele e fai ai faatoaga e agai i ai le toatele e fai se faatoaga e ola ai. Na o le pau lava le tulaga e tilotilo i ai, o le tulaga o pisinisi ma falefaigaluega e sue ai se galuega. Ua maitau atu lau Afioga i le Lipoti a le Matagaluega, e i ai le lala a le Matagaluega lea e i ai o le Industry Development and investment for most division, ma e maitau atu foi i faamaumauga a le Ofisa o Fuainumera Faamauina, tusa o tagata faigaluega i totonu o Samoa e 34,530 tagata faigaluega e le o faitauina ai i latou o la e fai lava lana ia faatoaga. O lo o lisi uma mai lava vaega eseese o lo o faigaluega ai tagata ia. Ae ou te maitau atu i le manufacturing, e 2,350 le aofai o le aufaigaluega lea e i totonu.

Na o se manatu lau Afioga, o le vaega masani lava lea e maua mai ai tatou tupe, o aiga mai fafo, o tagata tafafao maimoa mai fafo, o faatoaga pei lava ona sau ai i aso la. Ae tataua ona tagai i se isi auala o le faateleina o le vaega lea o pisinisi, e le gata ina maua ai le avanoa e ave ai oloa i fafo, a o le faigaluega ai la o le toatele i le taulaga, aua ou te lagona e aupito taugofie lava po o le a lau oloa e gaosi, e taugofie lava i totonu o Apia e oo i Faleata, aua e lata mai le mea e i ai le uafu ma le mea e ave ai i fafo au oloa.

E i ai se faataitaiga lau Afioga na ou faitau ai i le nusipepa i Niu Sila, o le fetalaiga lea a Tupai Saleimoa Vaai, o koko uma lava o le latou faatoaga koko i Savaii, ua fai lana galuega ma le kamupani sukalati lea o le Whitakers e avatu uma lava ana koko i Savaii ave fai ai le sukalati a le Whitakers ae tau o le sukalati Samoa, e tau mai foi la le vaega o Savaii lea e avatu ai le sukalati. E oo foi lau Afioga i le malaga lea sa ou taitaia i Sini, o lea sa lipoti mai foi le chips lea e gaosia e le Susuga ia Suliana Ott, o lena foi ua maua le avanoa o lana kamupani e ave ai i fafo ana oloa ia, ma o se mea manaia lea tulaga. Na o se fautuaga i lau Afioga ma le Matagaluega, se i tagai ane i se auala e mafai ona fesoasoani ai i atinae faapea a o tatou lava tagata ina ia faateleina ai le oloa e auina atu i fafo.

Lau Afioga i le Minisita mo Punaoa Faanatura ma le Siosiomaga, ou te maitau atu i le Tala o le Tupe, e \$7,470,803 le tupe lea na sue mai lava e le Matagaluega i le Faalapotopotoga a Malo Aafaatasi faapea foi isi Faalapotopotoga e fesoasoani i le tulaga lea o le aafiaga o le tau. Lau Afioga, e i ai le faaupuga e fai ia matou nei i le Vaimauga, 'E a ulu e tafe ae selefutia ai Vaisigano.' O se tasi lea o mafatiaga i taimi uma lava, e tigaina Matautu ma Apia i le tafe o le Vaisigano. E maitau atu foi i le Lipoti a le Faalapotopotoga o le Vaaitau o le Lalolagi, o la e foi e aofia i totonu o le Lipoti a le Matagaluega, e faapea i le faasolo atu i le lumanai i le suiga o le tau o lo o i ai, o le a faateleina le malosi o afa, ma e le o se mea taumate le tulaga lea, o lea tatou te vaai uma lava i le TV i afa o lo o tutupu i isi atunuu i fafo, le afa lea na matua faaleagaina ai lava Filipaina, le Tornados i totonu o Amerika ua aumai faamaumauga i le malosi ma le umi o le Tornado lea ua sili atu. Ma ou te iloa foi o le mea o le a i ai nei ia tatou, e i ai le ituaiga tulaga lea e aafia ai matou nei i le Vaimauga ona o le tafe o le vai.

E talosaga atu i lau Afioga i ituaiga tupe ia faapea, pe le maua mai se vaegatupe, i lau lava vaai i ai, na pau le auala lea e totoe i Vaisigano o le faamaualuga pe faasima pe faamaualuga auvai o le Vaisigano sau mai le Lelata tau i tai i le auala sima lea e i Vaisigano, e puipuia ai le itumalo i taimi o lologa mai afa. Lau Afioga, e le faapea foi na o afa e i ai taimi ia e lolovaia ai Apia ma Matautu i le Vaisigano, e i ai foi taimi o timuga mamafa masani i le amataga o le tausaga, e lolovaia uma tai ia matou i Matautu ma Apia. O le talosaga lea lau Afioga, o le a fai ma faafitauli tumau i lo matou itumalo, a o le tele ia o aiga ma pisinisi o lo o i le vaega lea, o taimi uma lava e lolovai ai, e aafia a latou pisinisi ma aiga. O lea e vaai, e faafetai atu ai i lau Afioga i le Minisita mo Galuega, o lea ua ou vaai i Fugalei, o lea ua fai le alavai lena e fesoasoani, aua o le tasi foi lea vaega o le taulaga e lolovaia pe a timuga tetele, lea e fai ai le alavai. E oo foi la i le Vaisigano lea, e tumau pea le aafiaga o le matou itumalo pe a pa le vai. Na o se manatu vaivai lea lau Afioga.

Lau Afioga i le Fofoga Fetalai, faafetai tele mo le avanoa. Ia manuia tele le Fono.

FOFOGA FETALAI: Malo, saunoa i lau Afioga i le sui usufono mamalu mo Vaimauga Sisifo lau Tofa Lefau, malo faafetai i fautuaga ua tuuina mai e fesoasoani i le tatou Minisita i le tatou Tala o le Tupe ma le faafetai foi i le itumalo, ia o mama na a o tatou alo atu i le faaiuga o tatou galuega faaiu o lenei tausaga. Ua avanoa le Maota mo se tasi o sui usufono e fia saunoa.

Ia o le a soofau ma le sui usufono mo Faleata Sasae, Tofa Aveau ua avanoa le Maota mo le saunoaga a le sui usufono mamalu.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, e momoli atu foi le faafetai i le paia ma le mamalu o le Palemene.

Ae ou te le i faia se manatu i le Tala o le Tupe, ou te muai taia le tutafaitoa pei o le fetalaiga i le ava nai Utumalama, e ao foi ona ou faatulou i le fale pogisa, le paia o Samoa mai le Taisamasama seia paia le Taiulaula, leaga e faigata o le fale pogisa e teu ai le tofa a Samoa, o le fale ua tulutulu i tao fale foi ua soo ona taiao.

Ou te faatalofa atu i le paia ma le mamalu o le atunuu, ae masalo ona o le taimi o le a ou nuunuu i le paia ma mamalu o le atunuu, i le aleaga a Tumua ma Pule, faleupolu o tofiga, aua le latou fatuaiga tausii lea.

E ao foi ona ou faatalofa i le motu i Tutuila ma Manua i e foi le paia o le Malo aemaise o le mamalu foi o lena foi itu o le tatou Faigamalo, ia po o le tasi o le tatou vaega o Samoa. Ou te faatalofa foi i susuga i Faafeagaiga ma o latou faletua.

Ae ou te le i oo la i le isi vaega lea e ao ona ou faatalofa i lou itumalo o Faleata Sasae, malo le tapuai, malo foi le onosai, aua... Faafetai atu lava i le sui usufono lea na maea atu nei ua ave lana faafetai i le Malo, aemaise le faatinoina o galuega e pei ona i ai. Ia ou te iloa foi e tele galuega sa faatinoina i totonu o Faleata, ae i ai lava nai vaega ia na lauga mai lava le sui usufono faatoa oo mai i totonu o le Palemene, e oo mai nei lava e le i maua lava i ai se tali, tai pei o le auala foi lea ou te taologologo atu lava lea e alu i le vilimaa i Samalaga, e fai sina toatele o le afioaga o lo o nonofo ai i ina, ia e matua le mafai lava ona alu i ai se pasi i le taimi lenei. Na ona talosaga atu e faataatia atu, afai o i ai se faamoemoega i luma, ia tautuana i lau Afioga i le Minisita aemaise o le Afioga i le Palemia ma le mamalu o le Malo lea vaega, e le gata i lea, ne i te i ua faapea Faleata e leai ni ē e galulue, e tasi lea itumalo e ese le galulue o tagata, o lea foi sa i ai le fanua tele lava i Laloanea sa aumai e galulue ai, e le gata la i Faleata Sasae ae faapea foi Faleata Sisifo. E faapena foi ma le falefa i le alu atu faapea i le itu lea e tau lava i o i Aana, o latou uma lava na e faaogaina le auala lea e alu i Laloanea, ae na ona taatia atu lava, sa taumafai lava e avatu se talosaga, a i ai se tupe o totoe a le tatou Malo, ia alofa ane i le vaega lea.

Lau Afioga i le Fofoga Fetalai, o le a oo lau tautalaga i i i le vaega lea o le Ofisa o Aoga, e momoli lau faafetai i le Afioga i le Minisita aemaise le mamalu i le Matagaluega, e i ai ni vaega ia na ona ou faamanatu atu i lau Afioga. O lea na saunoa le sui usufono lea mo Vaimauga Sisifo ma tau laulau atu ia schedule aemaise i tupulaga. I lalo lava o le vaega lea, o le tele ia o le pasene o tamaiti foi ia ua le faaauuina aoga, a o le mafuaaga autu lava lea e i ai nei, o le le mafai ona totogi pili le mafai ona totogi ia tupe e faatino ai le vaega lea. A o le fesili, e aoga fua lava ia le vaega lea le vaega lea e sau i lalo i le primary e tau lava i luga i le year 11 e aoga fua uma lava. Ae sau le faamauga e toetiiti lava 60% o tagata e le faaauuina aoga, e mafua mai, e le mafai ona totogi pili, cannot afford e totogi le vaega lea, ae i ai lou talitonuga e le na o le pili lea e le mafai ona faatino i i.

Aua a silasila foi, e ui o lea e fai le polokalame lea, faafetai lava i le polokalame lea, o se polokalame ese le taua, faafetai lava ua ae se tofa e faatino le vaega lea i le fanau, aua pei lava ona silafia, o le fanau lava o le lumanai lea o Samoa. A o lea lava pei ona silafia e le Fofoga Fetalai aemaise o le mamalu o le Maota nei, o lo o i ai lava faafitauli nei. O le fesili pe aisea, aisea? E i ai nai vaega ia ua ou vaavaai i ai, atonu e fesoasoani i le Afioga i le Minisita aemaise o le Matagaluega, ou te iloa foi e le o nofoai ai foi i i le Matagaluega o lo o faatino le galuega o lo o taumafai e faatino pe aisea e ala ai ona faapea?

O lau maitau lau Afioga i le Fofoga Fetalai, o le vaega muamua, o le vaega lea e totogi ai mea e tau o PTA fees o pili o fees, o le tali foi la a komiti, e fesoasoani e totogi ai le vai, totogi ai le eletise. Ae a maitau i tua e le i faia le vaega lea o school fees scheme lea, o le pili lava lea e avatu e le Malo, o le pili lava na sa totogi e tamaiti e kava ai mea ia kava ai ma meaaoga, a o lea la ua totogi atu e le Malo le vaega nei a o lea e i ai lava le faafitauli lea. Ia se i silasila mai lau Afioga i le Minisita ma le mamalu o le Matagaluega i le faatinoina o le scheme lea, pe le mafai ona alu atu i tua, tatala laitiiti le avanoa, ina ia mafai ona faatino ai isi vaega ia e fesiligia e.... E i ai aoga foi ia ua oo i le 300, 500 ia tamaiti aoga, a faatele i le tupe lea, ou te iloa e lava le vaega o le seleni lea e fesoasoani ai i mea ia tai pei o le pili o le vai. Pe le mafai ona tagatagai le Afioga i le Palemia aemaise o le Afioga i le Minisita, pe le mafai ona ave se fesoasoani i le vaega lea, le pili o le vai, le pili o le moli.

E i ai foi lou manatu, pe le ua alagatau i lenei vaitaimi ona tagai le Malo pe le mafai ona alu ai ma aoga ia i lalo o le Malo vaai uma e le Malo faleaoga nei, vaai uma faatino e le Malo mea uma nei, fai ma aseta a le Malo, ona maua ai lea o le galuega e mafai ai ona tagai le Malo i le maintain ina o mea nei. E i ai foi lou manatu, pe le mafai ona toe tagai le Malo, pe le mafai ona toe tuufaatasi isi aoga la e laiti a latou roll, aua e i ai aoga foi ia ua ova i le \$100,000, \$500,000 e alu e fai ai faleaoga ia pe oo atu i le miliona, ae pe na o le 200 le lola po o lalo ifo foi, e tolu faiaoga, fa faiaoga. Ae a pe a tagai ane, pe le mafai ona tuufaatasi aoga ia, ona tau ai foi lea i le isi problem, o le a mamao foi le mea e savali ai le isi tamaiti aoga i le isi aoga e alu i o i le aoga lea, ia ona i ai foi lea o le isi mea e fofo ai. E tasi lea vaega e ala ai ona le aoga tamaiti, o le tele o tupe alu i le totogiina o pasese taumafai e alu ai le tamaitiiti i le aoga, e le faigofie, ou te iloa e taugata atu le totogiina o le pasese e alu ai le tamaitiiti i le aoga i le pili lea e totogi. Pe le tagai ane la i ai, faaaoga ni pasi, e i ai pasi a le tatou SIDS lea e i ai i i, pe le mafai ona fesoasoani ai i i i nai aoga ia, taatia ia totonu o le taulaga, taatia Faleata Sasae latou aua o lea e latalata i le aoga i Vaimoso pe a totoe, ae o lau tatalo, vaai nai aoga ia e i tua i Savaii, pe le mafai ona ave i ai ni pasi e faaaoga ai e...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui (Palemia): Lau Afioga i le Fofoga Fetalai.....

FOFOGA FETALAI: Malie le sui usufono, se i tuu atu le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Ua uma ona tufa pasi, aua ne i toe lauga mai ai se isi ua uma

ona tufa i Faalapotopotoga, ua leai la se pasi o toe totoe. O lea ou te manatua i aso la, e ta loa le afa o le 6 ou sopo atu i i i Saleufi, ou te savali atu lava i i ou te alu i uta i Saint Joseph. Se i uma a oulua talanoaga ma le Taitai o le Itu Agai. O aso nei, pe na o le 500 iata ae ua oso le tamaitiiti e tietie i le pasi ua le toe savali, ae ua tele foi taavale e tietie ai. O le tulaga lea e i ai, masalo o le isi lea mea o tatou lea o lo o i totonu o le Maota lenei, o le tele o lauga ia ou te vaai i ai, aemaise lava pe a oo ina lalata i le Faiga Palota ua oo ina faamatanana le faiga o lauga, tau le mea sao, ae a liliu atu nei foi la le Malo e saili tupe e faatino ai mea ia tou te aumai ia ona outou pese mai foi lea, faapaleni, fua le tupe alu i le tupe maua. O le mea lena e tataua ona fai, ae le o mafai la ona taofiofi ai i i atinae moomia, auā pe ana tatou faia le taiala i se itu faapaleni, masalo o lea faatoa tatou oo mai i le tausaga e 2000 i le atinae o Samoa, e le i taitai ona faia mea nei pe ana tatou o i le ituaiga manatu lea. O le mea la lea, se a saunoa mai, saunoa mai ma tau sao mai le mea moni. Ae soia tatou te taumafai e faamatanana lo tatou atunuu. O lea la ua uma ona ou tau atua ua uma ona tufa pasi ia mai Saina, ae vagana la pasi taugata la e totoe nei mai Iapani i luga o aiaiga sa aumai, o la foi la e fai i ai le fuafuaga a le Malo, a o le toatele ia o Faalapotopotoga e oo lava i isi Faalapotopotoga e lē tataua ona talosaga mai i ni pasi, ia ua talosaga mai lava.

A o le mea lea na saunoa i ai le Minisita, o le mea tonu lava lena e tataua ona fai. O le faafitauli lea o tamaiti aoga, o le faafitauli o tatou uma - ma o le isi lava malosi e tataua ona faaoga, o le malosi lea o alii ma faipule i totonu o afioaga, i le tulaga o le faia o komiti e matua o e mataitu tamaiti e le o i aoga, ona fai lea i ai o fuafuaga faatasi ai ma komiti o aoga. O isi ia komiti e aupito sili ona taoto ai i luga o latou tiute le vaaiga lelei o mea ia o faleaoga ma le vaaiga lelei o tamaiti aoga ia o i aoga. Ou te lagona o le tele lava o afioaga ua uma ona tagofia le mataupu lea, se i vagana i inei i le taulaga. Aemaise lava afioaga ia e sau ai le sui usufono o lo o saunoa nei. Masalo ana e taulamua i lou alu e te auai i fono a lo outou nuu ma taulamua i le mea lenei o le fai i le komiti e o e vaai ia aiga po o i ai ni tamaiti e le o aoga. Ona fai lea i ai o faaiuga, aua a fai loa iuga faapena e faaoga i ai le malosi faaleaganuu o alii ma faipule, ia ona laitiiti lea o le galuega e tau fai i ai mo fanau e le o i aoga.

FOFOGA FETALAI: Malo faafetai. Se i tulai mai le Sui Taitai o le Itu Agai, lau Afioga i le sui usufono mo Falealupo.

Afioga Hon Aeau Peniamina Leavaiseeta (Falealupo): Lau Afioga i le Fofoga Fetalai, faamolemole lava, e taua tele le saunoaga a le Afioga i le Palemia o le upu lea o le tufa faafetai lava. Faamolemole lava lau Afioga pe mafai lava ona e faalau mai le tufaga, o la e faafofoga le atunuu i le taua tele o le.....

FOFOGA FETALAI: O lea ua maua lou finagalo ia...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai lava le taimi e faasalalau atu ai ia a'u polokalame o faatalanoaga ma le media i vaiaso taitasi. O le faalavelave a faasalalau atu au polokalame ae omai le au Tusitala fai mai, e le fia faalogo le aualii la i au polokalame, ae faalogologo lelei mai pe a alu atu lau polokalame i le Aso Tofi nei po o le Aso Tofi o lea vaiaso.

FOFOGA FETALAI: Ia tulai mai le sui usufono mamalu mo Faleata Sasae e faaauau le saunoaga.

Tofa AVEAU TUALA LEPALE NIKO PALAMO: Faafetai i lau Afioga i le Fofoga Fetalai. O le vaega lea ou te taumafai atu ai ina ia... A faafofoga foi la i ai, ou te le o lauga atu i le HRPP ou te lauga i tagata uma o le Malo o le mea e tatou te o e fai faatasi, leaga o le autu lena o le Aso Sa ananafi, ia tatou o e fai ia tasi i tatou, fai faatasi, o lea la e alu atu ai lau lauga lea.

O le vaega lea ou te taumafai atu ai i le faaaogaina lea, o lea e i ai le manulauti a le Malo i lalo o le Tala o le Tupe lenei lea e sau foi i i le Fiscal Strategy lea ma le Budget Address lea e i ai, o lo o i ai le fuafuaga a le Malo e taumafai e faaitiitia vaega e le maua ai ni galuega ae faamalosi atinae e manuia ai Samoa o lea e i totonu. O aoga o le manulauti o tatou, ia aoga tamaiti, po o le a le ituaiga tamaitiiti, ia mafai ona alu le tamaitiiti i le aoga, we have to provide education, anybody, po o le a le ituaiga auala e i ai le tamaitiiti. Afai foi la e i ai se mafuaaga ua ala ai ona le mafai ona aoga le tamaitiiti lenei, o le responsibility lena a tatou. Afai la e vaai atu tatou aemaise le Malo o le mafuaaga lea e le aoga ai tamaiti e pei ona fai mai i i e le afford le tau o le alu i le aoga, e le na o le pili lea e sau ai le vaega lea, e lavea ai ma le alu i le pasi. Fua ane e oe le pasese e sau ai le tagata mai Aana e alu i o i le aoga po o le alu foi i tua i nuu i tua, o isi nuu, e mamao aoga e savavali i ai. O le mea lena e ala ai ona avatu, tagai ane i le vaega lea.

FOFOGA FETALAI: Malie le sui usufono se i tuu atu le avanoa i le Minisita mo Aoga, Taaloga ma Aganuu.

Afioga Hon Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai, ua ou tulai atu, o lea e tau mafaufau atu, leitioa fai mai isi e palapala le mea lea o le polokiki. O le polokiki lava ia e lelei, ae a aumai loa lauga ia e pei ona saunoa le Palemia, ona le lelei lea. O lea e saunoa o le tatou tiute lea. O le mea lea ou te iloa e ala ai ona le o tamaiti i le aoga, e le faataua e matua. E fia ou alo o aoga? E fia outou alo o lo o aoga? Aisea na aoga uma ai na tagata ma iu lelei? E faataua e oe. O le mea lea e uunai atu ai le tatou atunuu, lea ua o ai i tua le Matagaluega, aumai uma lava matua i le taimi lenei, ia latou iloa le taua o le aoaoina o le tamaitiiti. O le faafitauli numera tasi lena, e le faataua e matua aoaoga a le fanau. E tataua ia i tatou i le Maota lenei ona tatou lauga foi lea faamalosi i tagata, aua o le galuega lea a le Matagaluega o Aoga lea ua fai, aumai matua, aumai faifeau, faitau tusi ma mea faapena. Ae ia silafia foi, o lea faatoa tasi le tausaga talu ona alu le Malo i luga e tologi pili o le tausaga 11, lea la ua fai ai suesuega ia. O le i isi tolu i le fa, lima, sefulu tausaga agai luma, ona outou vaai lea ua fua mai le mea lea. O lea lava e fai le galuega a le Malo, fesoasoani mai ma outou i a outou lauga, faataua e matua le mea lea. Aua o le toatele o tamaiti ia e fai mai e toaiva le aiga ae toatasi e faigaluega, a o le fesili o fea la e faigaluega ai, leiloa po o faigaluega ia Frankie. Ae a tuu le avanoa i le tamaitiiti lea e alu ai ma maua sona faailoga, faaselau onosefulu, luaselau pasene le tupe la e ave i le aiga i le taimi lenei pe a malamalama le aiga i le mea lea e tupu i le taimi lenei. E leai se isi o le Maota lenei e le o iu lelei a latou fanau. Aisea? Leaga e tou te faataua. E le tutusa la le toatele o le atunuu ma outou finagalo. Ma le faaaloalo.

FOFOGA FETALAI: Malo faafetai.

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai o se mea e fia faamalamalama i le saunoaga a le sui usufono.

FOFOGA FETALAI: Saunoa le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, o lea ua saunoa le Afioga i le Minisita, o mea o polokiki palapala. A o lea e saunoa le sui usufono, o le galuega e faifaatasi. E ala ona faaletonu tamaiti ona ua le gafatia e matua, e leai se tupe, taugata le soifuaga. O lea la e fautua atu ai le itu leni, tatou galulue faatasi e faaaoga tamaiti.

FOFOGA FETALAI: O lea ua maua atu lou finagalo.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lena na saunoa manino ai lava le Afioga i le Minisita i le aso lea, o le manaia ia o le saunoaga, o le tatou galuega e faifaatasi. Ia o lea foi ua e toe tu mai e pese mai ai, ae o le manaia ia o le saunoaga a le Minisita i le vaiaso le la, o le tatou galuega e faifaatasi. Ia aumai loa le faataitaiga, e le mafai e le tamaitiiti mai Vailuutai ona totogi le pasi e sau ai i Apia. O le mea lena na ala ai ona fai tatou aoga i tua, e oo lava i kolisi ua avatu i tua ia aua ai le soona malaga mamao, ia nofonofa lava le tamaitiiti ia i tafatafa o lona tina i Savaii ma alu i le kolisi lela e i Savaii. E tutusa lelei lava nanu e maua i Savaii ma nanu e maua iinei, aua foi e alu atu i ai ma TV ma internet ma mea uma. O le mea lena o lea e fai, o lea e fai le galuega a le Malo.

E pei la o le tulaga lena lau Afioga, o le faalavelave o Palu, o lou tu pogisa mai fua o oe e tau avesese le mataupu a le sui usufono o lea e saunoa, a o le mea lena ua uma ona pasi mai ai le Minisita mo Aoga i lana saunoaga i le vaiaso le la. Ia, o le a matou faalogologo atu ae faaauau le saunoaga a le sui usufono.

Afioga Hon Palusalue Faapo II: Lau Afioga i le sui usufono, o le saunoaga a le Minisita o le polokiki palapala, o la e faafogafoga mai le atunuu. E tataua ona aveese ia upu.

FOFOGA FETALAI: O lea ua ou maua lou finagalo Palusalue. O le faamalamalamaga a le Afioga i le Minisita o le a tuu atu pea. Se i tulai mai lau Afioga i le Minisita.

Afioga Hon Magele Mauiliu: E pule lava le tagata ia i lana faauiga, a o le tagata ia o la e lagona mai le mea lea ou te fai atu ai, e mama. Ae a palapala lava le loto o le tagata ia pei o le Taitai o le Itu Agai, e palapala foi lana faauigaga. Faafetai.

FOFOGA FETALAI: O le a le faafinauina, malilie sui usufono, aua ia le... E le o ni ai avea lau Afioga i le Taitai o le Itu Agai, ua se toa foi, se o oe lea e faalupe o oe le Aiga Malosi e tutasi ia Samoa, a o lena ua e tau vaivai mai foi i leni taeao. Taatia pea le lauga o lea ua manino le faamalamalamaga a le

Minisita mo Aoga, ou te manatu foi na matua tatou lagona lelei lana folasaga taua i lenei vaiaso, o ai e tuuai i ai nei mea? O tatou, o matua. O lea foi e sagatonu, e taua foi le saunoaga a le sui usufono ma le faamalamalama a le Malo. A o lea ua saunoa le Malo, ou te le iloa po o le a le isi mea e toe faia. E fai mea uma, e oo lava i pasi lea tatou te tau vevesi ai nei i le taeao, o lea e tau ave pasi e felauai tamaiti. A o le tiute o matua, a manao le matua ia lelei lana fanau, fai lona tiute. A o lea foi e augani le Maota i le tiute o le Malo ia maua mai ai le faufautua. Tulai mai Aveau. Ou te manatu ua manino lea tulaga i aoaoga, ae faaauau lau saunoaga.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e i ai lava le upu foi lea, "E palapala lava mea ia i le tagata e loto palapala," a o le agaga lea e avatu ai le lauga, e leai. E sao lelei le saunoaga lea i tiute o matua. E leai se matua e le manao e ave sana tama i le aoga. E iloa uma lava e matua o le lumanai manuia lea o fanau, ma le aiga o le ave o le tamaitiiti i le aoga, ae leai se mea e mafai e le matua pe a le tagolima, e leaga ua ou vaai i ai i le mea lea. O le ala lena o lou tiute e lauga atu, fai se fesoasoani ma se tuualalo i se vaega ina ia mafai ona foia le faafitauli lea.

O le isi vaega o le a ou see ese ma le vaega lea, o le isi vaega e alu ai foi le tupe a le tamaitiiti, o le meaai, lunch. Masalo ua silafia e le Palemene lenei le amataga lava o lau lauga na ou lauga ai i le lunch programme, ou te le toe lauga ai, ae na ona faataatia atu se i tagai ane i ai aua o le polokalame lenei e manuia uma ai Samoa, e manuia ai itumalo, e nofo ai le tupe i totonu o itumalo aua o a uma fruits, o mea uma i totonu o le atunuu lenei, e alu uma i le polokalame lenei, o tupe uma o le polokalame lenei e alu aoga, e invest tatou i a tatou fanau.

Ona ou see mai lea i le isi vaega lea lau Afioga, o le vaega lea o le Science. Se i toe tagai ane lava lau Afioga i le Minisita aemaise o le Matagaluega i le faatinoina o le polokalame lea, ona e manaia le agaga na faatinoina ai le polokalame lenei, e mafua mai ona o le le lava o faiaoga. A o le mea lea ua tupu, o tamaitiiti o isi aoga ia e oo loa i le Year 12 po o le tausaga 12, ona o loa lea e faatino le mataupu lea i le isi aoga. O le mea la lea ua tupu, ua alu lava le tamaitiiti ia nofo ai e aoga i le Year 12 i ina, a le mafai ona sui lea o lana mataupu. Ona le avea lea o le Science ae ave le isi mataupu. A fika la i le tamaitiiti e tau lava i le Year 11 ave le Science ae oo atu i le Year 12 ona ua le faia le Science i totonu o lana aoga, taumafai loa e alu i le aoga lea, ia, Asau ae alu agai o i... O le matua faigata lava ona oo i le piriota o le Science ona alu lea o le tamaitiiti i o. Tagai ane lau Afioga i le Minisita i se isi fofo e fofo ai le vaega lea. O le mea lena e ala ai ona ou fai atu i pasi ia.

FOFOGA FETALAI: Malie lau Afioga i le sui usufono mo Faleata Sisifo se i tuu atu le avanoa i le Afioga i le Minisita mo Aoga.

Afioga Hon Magele Mauiliu: Faafetai mo le avanoa. E leai foi se manatu e faalavelave i le saunoaga a le sui usufono mamalu. Na pau lava o lea, ua uma foi ona fola i le Maota lenei mea na ala ai ona mafua ona fai le suiga lea mo se taimi le tumau a o faatalitali a tatou faiaoga. O lau fesili la i le sui usufono, pe i ai sau mea e sili atu i le mea lea pe afai... O lea ua e tu mai ma e fai mai e le lelei. O le a la sau mea e tatau ona fai i aoga?

FOFOGA FETALAI: Malo. Se i tulai mai le sui usufono mamalu.

Tofa AVEAU TUALA LEPALE NIKO PALAMO: Faafetai. A foi la le mea lea na ou talosaga atu ai i pasi ia. O pasi ia na ou talosaga atu ai, aua afai la e fai le mea lea ae sau le pasi po o le taavale e ao atu tamaiti e ave e fai lana Science i o, a uma ona toe tufa mai lea o tamaiti i latou aoga, o i e fofo ai le faafitauli lea. O le mea lea na ou talosaga atu ai i le vaega lea.

O le vaega lona tolu lau Afioga, o le...

FOFOGA FETALAI: Malie le sui usufono mamalu leaga o lea ua e toe taua pasi.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaioi: Lau Afioga i le Fofoga Fetalai, e i ai le mea e tupu. A uma ona talosaga mai i le pasi ona talosaga mai foi lea i se avetaavale. A uma ona talosaga mai i se avetaavale, ona talosaga mai foi lea e faatupe le penisini. A uma ona talosaga mai e faatupe le penisini ona talosaga mai foi lea i ni toilet rolls.

FOFOGA FETALAI: Tulai mai le sui usufono mamalu.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, o le faapenisiniina, a taumafai tatou ia Minisita Lagolago e aua le utua e le Malo a outou taavale ae aumai tupe na e utu ai pasi ia, o i ina tonu lava e maua ai le penisini e utu ai pasi ia. E oo foi i galuega a tagata ia, o lea foi o le a sue ai ma le avepasi.

Lau Afioga i le Minisita mo Taaloga, o lea ua latalata mai le tatou taumafaiga lea i le Youth Commonwealth Games. Faamalo atu le tapenapena. Ou te iloa o lea ua i totonu o le tatou Tala o le Tupe le \$5milionia e ave e tapena ai. Na pau lava lau tuualalo atu i lau Afioga, po o i ai se fuafuaga e faamatu se vaegatupe e tapena ai le tatou au, tapena ai alo ma fanau o lo o taumafai e alu e fai ma sui o Samoa i taaloga. O taaloga ia e le o ni taaloga... e sao o taaloga a le 17 po o le 18 tausaga agai lalo, a o taaloga a Malo o le Taupulega, e omai ai Peretania, e omai ai atunuu tetele, a o lea e oo mai lava i le taimi lenei, ou te le iloa po o i ai se tatou au e tapena aua e i ai foi le taitoafitu i le taaloga lea e i ai. O lea ua uma ona tapena tatou i le faatinoina o taaloga, tapenaina o fale lelei ma malae lelei, ae se i tagai ane i le tapenaina i uma ifo e leai se tatou pine, ona ave foi lea o le faitioga i tagata taaalo ae le o tagolima, e le o lava se seleni e faatino ai lea vaega. Se i tagai ane le Malo pe i ai sina vaegatupe e faamatu i asosi ia o taaloga ia e faatinoina ia e fai mai i nei ina ia mafai ona tapena fanau a le tatou atunuu o lo o tausinio i ia foi taaloga.

Lau Afioga i le Fofoga Fetalai, ona ou oo mai lea i le Matagaluega o Faatoaga. Faafetai i le Malo i se finagalo o le a ave le faamuamua i le Matagaluega o Faatoaga. Masalo o lea e silafia lelei e le Minisita mo Faatoaga o le mea lava lena o lea e taumafai atu ai lenei Itu ina ia ave le faamuamua i le Matagaluega o Faatoaga, aua o i e foia ai. O lea foi ua saunua le Sui Palemia i le vaiaso ua tuanai, o le toatele o tagata le faigaluega, o i e faamoemoe i ai, o le vaega lea, aua foi o le galuega a le Matagaluega o Aoga o le faaaooga o tamaiti. Pe fia afe tamaiti e iu mai, o le galuega lena. O lea

tatou te iloa i figures nei, e moni lava e toatele tamaiti e le o aoga, a o lea e tele lava polokalame ia e aoga ai tamaiti. A o le a le mea lea e tupu? E le o faia le galuega a tatou, e sue le galuega e ave i ai tamaiti ia, sue galuega e ave ai tamaiti ia e iu mai aoga. O le galuega lena a le Malo, e le o se galuega a le Matagaluega o Aoga. E tasi la lea vaega pei ona saunoa lau Afioga i le Sui Palemia, pei o lea o le a ave le excuse foi lele faapea, leaga o le olaga lava ia o le Samoa e te ola mai lava oe ia ua i ai le maumaga, o lau lafu puaa ma lau lafu povi ma lau lafu moa. O le agaga lena.

FOFOGA FETALAI: Malie le sui usufono mamalu se i faapulapula atu e le Afioga i le Sui Palemia.

Tulai mai le Sui Palemia.

Tofa Hon Fonotoe Nuafesili Pierre Lauofo (Sui Palemia, Minisita mo Pisinisi, Alamanuia ma Leipa): Lau Afioga i le Fofoga Fetalai, o se mataupu e fia faapulapula lea ua taunuu i ai le saunoaga a le sui usufono mamalu. E momoli atu ai le faafetai i le saunoaga matagofie. Na pau lava le mea lea e fia faamanatu atu, o le tele o fale gaosi oloa lea na saunoa i ai le sui usufono mo Vaimauga Sisifo, lea e moomia e maua ai galuega, latou te faaaogaina fua o faatoaga, lea foi na taua e le sui usufono lea mo Vaimauga Sisifo le chips. Ia manatua foi la e faaoga le fai ma le talo e gaosi ai mea ia po o taumafa ia ma saunia lelei mo le faatauina atu i fafo, o le mea lena e taua ai foi mea o faatoaga i le aufai fale gaosi oloa, aua e galulue faatasi o i ina e faaoga i ai le tele o isi a tatou fua o faaeleleaga lea e le mafai ona faatauina atu i fafo ae faaoga iinei i Samoa mea foi ia e tau o value added, a, ona saunia faalelei laia ma teu faalelei i pepa foi ia ma tulaga faapena, ona faigofie ai lea ona taulia i fafo. A silasila foi la i faamaumauga lata mai, ona o le faalavelave o le tele o isi lipoti lea ou te faalogo atu o saunoa mai ai la outou Itu, o lipoti foi ia tai 6 masina, tai 3 masina, a o faamaumauga lata mai lea e maua e au ona o lea ma te fesootai sao lava ma kamupani ia ma le aufai fale gaosi oloa, ua matua sii maualuga le tatou export. O se tala fiafia lena, masalo o lena e lolomi mai e nisi foi o nusipepa nisi o lipoti a le Faalapotopotoga foi lea o le auvaega foi lea fai fale gaosi oloa lea e faatauina atu oloa i fafo. O lea la a maitauina, ua siisii i luga le mea e maua mai i a tatou oloa ia e faatauina atu i fafo.

E pei o le tulaga lena e taua ai foi le galulue o nisi o le tatou atunuu i faatoaga ia, o latou la na e aumaia fua o faatoaga i totonu o fale gaosi oloa nei ma saunia oloa o taumafa mo le auina atu i fafo. E pei o le itu lea lau Afioga e faapupula atu, ona o lea pei e agai mai foi le sui usufono i mea o galuega ia faapea, e manatua foi, o lea foi sa faamanatu atu e le Afioga i le Palemia i le vaiaso na tea nei, o latou uma lea e galulue, o le tele o latou ia e galulue i faatoaga, e le totogia ni lafoga i le Malo, e le totogia ni NPF, e le totogia ni ACC, e le totogia ni GST, a, e pei lava o le aufaifaiva lea e faatau a latou ia i le maketi o ia faapea foi autafa o auala, o tulaga faapena. O lea la e malamalama lelei ai, o lena e tele galuega faapena o lo o galulue ai nisi o le toatele o le atunuu, faafetai.

Afioga Hon Palusalua Faapo II: Lau Afioga i le Fofoga Fetalai, e tatau ona silasila lelei lau Afioga i le Sui Palemia i le Tulafono lea o le a pasia nei e GST ai le aufaifaatoaga, leaga e sese le mea lea e fai mai ai....

FOFOGA FETALAI: Malie, o lea ua ou maua le Taitai o le Itu Agai, e le mafai ona e agai i se mea e.....le Taitai o le Itu Agai.....

Afioga Hon Palusalue Faapo II: O le mea lea e laga atu nei, o le le faigaluega, e le maua ni galuega.....

FOFOGA FETALAI: Malie le Taitai o le Itu Agai, o lea e manino ma malamalama le faamalamalama a le Afioga i le Sui Palemia, aua tatou te agai i le atuvasa tatou te le i oo i ai, o lea o le a aumai Apolima tuu i Manono a o lea e tau folau lo tatou sa.

Tulai mai le sui usufono mo Faleata Sasae, e manatu ua manino ma malamalama le folasaga a le Sui Palemia e tau faapupula le mataupu.

Tofa AVEAU TUALA LEPALE NIKO PALAMO: Faafetai. Ona ou oo mai ai lea i le isi vaega lea o le Ofisa o Faatoaga i le tufa lea a le Evani faamolemole lau Afioga i le Minisita, a o lea foi ua toe vaai atu i le Tala o le Tupe lea ua toe sau ai le \$3miliona lea. Na ona fautua atu lava, se i tagai ane i le faasoasoina o lea vaega aua tasi lea vaega e taua tele i le atinaeina o le tatou galuega. E ave lau faamalo i le Ofisa o Faatoaga, ona a tagai i le tupe maua lea e sau i totonu i i, e le o se tupe tele, ae a tagai i ai i le sao o le Ofisa o Faatoaga ma tagata faifaatoaga i totonu o le tamaoiga o Samoa, e le o se tamai mea, o le mea foi lea na ou fautua ai i le isi vaitaimi i le Ofisa o Faatoaga, ao uma mai lipoti o containers ia e ave i fafo mea ia e saunoa i ai le Sui Palemia, lea e faaoga ai mea tau faatoaga, ona aumai lea o le tupe lena o le sao lena o le Ofisa o Faatoaga i totonu i le atinaeina o le Malo o Samoa, tagai ane lau Afioga i le vaega lea. Ia ma le vaega foi lea o le SACEP, atonu o lea e manaia lona faatinoina, e manaia foi pe a oo i ai lau saunoaga i se taimi e saunoa ai.

Ona oo mai lea lau Afioga i le Minisita mo Galuega, Felauaiga ma Atinae Eese, ou te fesiligia le vaega lea a EPC lau Afioga, aua o lea ua sau i totonu o le saunoaga a le Afioga i le Palemia i i i le vaega lea, a tagai i ai i objectives lea e aumai i i i le tusi lea o le Fiscal Strategy o le manaia ia o le faiga o le vaega lea, manaia ia o le faatinoina o le tagai a le Malo ia tele se sao o SOES i totonu o le tamaoiga o Samoa. O le mea lena e ala ai ona ave lau fesili i le vaega lea, aua a vaai foi i le tatou Tala o le Tupe lea e aumai, na o Estimate lava e pei ona saunoa i ai le Afioga i le Palemia mea foi ia pei ni miti, ae sa tataua la ona aumai ni actual o le tausaga lea ua tea, pe fia se tilotilo i ai, aua o lea foi e leai ni actual i i, pe fia se actual i i, pe fia se tupe na maua lelei ona ao. E ala ona ou fesili ona sa saunoa mai le Afioga i le Sui Palemia i le mea lea o le export ma le import, o lea ua alu i lalo le import ua alu i lalo le VAGST i import, alu i lalo tupe maua e ao mai i lafoga o mea ia mai fafo, a o lea e alu i luga le tupe e pei ona saunoa. O le fesili la pe aisea?

FOFOGA FETALAI: Se i tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea e tatou te talanoa i le Tala o le Tupe o le 2016. O le aso 22 lenei o Iuni toe valu aso ona uma lea o le tausaga 2015, o lona uiga o le tausaga talu ai o lea e le i uma. Ia se i uma ona aumai foi lea o lipoti, pei o tulaga masani..

FOFOGA FETALAI: Toe lima minute o le sui usufono, tulai mai le sui usufono mo Faleata Sasae e faaauau mai ma faaiu mai le saunoaga.

Tofa AVEAU TUALA LEPALE NIKO PALAMO: Ia lau Afioga i le Fofoga Fetalai, afai e le i uma le tausaga talu ai, ia aumai le tausaga i tua atu, aumai actuals o mea na faaoga ai vaega na o le Tala o le Tupe se i tatou tilotilo i ai pe sao le miti lea e aumai i i i le Tala o le Tupe. I le vaega lea faamolemole o le EPC, lea ua aumai ai saunoaga, e i ai se vaitaimi o lea ua ave le faamuamua a le Malo i le renewable energy, ina ia mafai ai ona selau pasene e mafai ai ona ola ai Samoa i le vaega lea le renewable energy, o lea na ou fesili ai foi i le isi fonotaga, pe mafai ona aumai se famaoniga mai le Matagaluega pe sao, pe lava le tau o le pili o le moli i le vaega lea pe afai e faatino le vaega lea. O lea foi e aumai i i i le lipoti a le Komiti, o lea e fautuaina isi Matagaluega o lo o alu le tupe tele i le totogiina o le pili o le moli e o e fai ni latou vaega ia. Aisea? Masalo o lea na fesiligia e le Komiti le vaega lea, o lea e faatuatua le Komiti o Tupe i i i le Malo o lea o le a fai e le Malo le vaega lea ona tufa lea i i aua pei ona silafia, o vaega uma lava ia o lea e alu uma i le EPC e tufa e le EPC. O lea la e avatu ai lau fesili, pe o le a se forecast, se tagai i luma a le Matagaluega i le vaega lea pe pau ai ia tau o le tatou eletise i i i le vaega lea aemaise le renewable energy.

O le vaega lona lua lau Afioga i le Fofoga Fetalai.....

FOFOGA FETALAI: Malie se i avatu le avanoa i le Afioga i le Taitaifono o le Komiti o Tupe, tulai mai Papaliitele Niko Lee Hang.

Susuga Hon Papaliitele Niko Lee Hang (Taitaifono, Komiti o Tupe Maua ma Tupe Totogi): Lau Afioga i le Fofoga Fetalai, faafetai mo le avanoa. E le fia faalavelave foi i le saunoaga matagofie a le sui usufono mamalu.

O le tulaga lea e fesiligia i le fautuaga a le Komiti, o le fautuaga se i silasila i le tulaga lea mo le solar, a faapea e silasila atu e mafai ona faaitiitia ai le tau o le eletise, ona faaoga lea, ae le faapea e fautua atu le Komiti e o e fai, o le fautuaga lea e taatia e toe silasila i ai pe.....a o le tulaga foi lele i le tau o le eletise mo le lumanai, o le tapenaga ia pe ave le faamuamua i le siosiomaga, le environment, o le tulaga lea i lou talitonuga. O le a lava le tau o le eletise i le lumanai, ia pei e ave le faamuamua i le tulaga lea e aafia ai nei le tatou siosiomaga i le suiga o le tau ma le tulaga lea, ma lou faaaloalo lava.

FOFOGA FETALAI: Tulai mai lau Afioga i le Minisita, e faasao le taimi o le sui usufono mamalu.

Tulai mai le Minisita mo Galuega, Felauaiga ma Atinae Eseese.

Afioga Hon Manualesagalala Mati Tuigamala Enokati Posala (Minisita mo Galuega, Felauaiga ma Atinae Eseese): Lau Afioga i le Fofoga Fetalai ou te manatu o le tasi lea o mataupu sa saunoa ai foi le sui usufono i le tausaga na tea nei, o lea lava e aumai pe i ai se pau o le fuafuaga lea e i ai a le Faalapotopotoga. Ae ou te iloa afai e faatau i le taimi lenei lau pili moli, ou te iloa ua i ai le suiga, o upu tautino ia ou te fai atu. O le mea sa i ai i le taimi po o le lua tausaga talu ai, a \$50 e 40iunite, a o le taimi lenei ou te iloa a \$50 ua

55iunite ua ova atu, o lona uiga o le mea sa i ai sa ova ma le \$1 le tau o le iunite, a o le taimi leni ua i lalo ifo o le \$1. O lea e faagasolo galuega a le Regulator, le review o le tatou Base Tariff tusa o lea e fuafua mo le amataga o Iulai, ua manino ia vaega. A o fesuiaga ia e i ai e manatua foi e tolu ia components ia e i ai i le tatou Tariff, o le vaega o le fuel charge o lea e fesuisui le tau, o le tulaga i investment charge ma le usage charge, o vaega foi ia i lalo o le 50iunite o aiga o la e pau domestic rates, la e i ai ma le non domestic, o tulaga na e i ai. Ae a e silasila i ai, o la ua tele le suiga o le pau o le eletise e le i maoti fuafuaga ia e faataamilo ona o le tele o renewable energy solar lea ua mafai ona fesoasoani mai i totonu o le grid a le EPC, ua tele le suiga o le tau o le tatou eletise o le mea manino lena mea, a sailiili o la e faafofoga mai le atunuu, o le tulaga lena o lea e i ai, a o le saga aumai lava e le lelei... Ia o le fesoasoani atu lena, ma le faaaloalo.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, masalo o le aumai soo o le mataupu leni e faavae i luga o le le malamalama i le faavae o mea. O le faavae o mea, o le ala lena o lea ua soona alu ai i luga le tau o mea. Ona o le suauu lea o le diesel, o le suauu ia e aofia uma ai lava ituaiga suauu eseeese e maua mai i le manava o le eleele. O lea la e pulea e latou e ana suauu ia tau. O lea e pulea e latou - ma e ua pule ai lava latou a manao loa lava ia tele a latou tupe ona taofi loa lea o le soona pamu mai i luga o le suauu e maua i le manava o le eleele. O le ala la lena e alu ai pea i luga, alu pea i luga, alu pea i luga tau o suauu. O le tausaga e 1970 na amata ai ona pagatia le lalolagi ona ua faaoga le paoa lea e atunuu o Arapi ma faalapotopotoga o lea e mauoloa i le suauu lea e maua mai i le manava o le eleele. O lea foi la e afua ai le fesuiaga o le tau ua afaina ai le siosiomaga. A o le mea la lea ua tatou faatāuā, o le agai o tatou e faaoga mea ia i totonu o Samoa. O lona uiga e le toe faalagolago i fafo. E lē toe pulea mai fafo. Aua foi e maua mai le la e leai se tau. E le tau faataua le susulu mai o le la. E maua mai i le suavai ma le matagi. A malamalama i mea na, ona iloa ai lea, e lē toe faalagolago tatou i mea ia, o lona uiga ua taofi le toe soona alu faavalevatea i luga o le tau, ae na o le pau lava le mea o le agai i lalo, aua o lea ua maua lava e Samoa ia mea e mafai ai ona gaosi e tatou lava le tatou eletise. A malamalama loa i le faavae lena, ua le toe tulai soo mai ni fesili faavalevatea i totonu o le Maota.

FOFOGA FETALAI: Ia e ava atu i le sui usufono mamalu, ua maea lou taimi le sui usufono mo Faleata Sasae, e faamalulu atu o lea ua tea mamao o le ava tele atu ona o nisi o faauilavea sa tuuina atu, ae faaiu mai le saunoaga le sui usufono mamalu.

Tofa AVEAU TUALA LEPALE NIKO PALAMO: Faafetai. Lau Afioga i le Fofoga Fetalai aemaise o le mamalu, e ala ona fesili ona o le fiu e fesili ae le tali sao mai. E avatu le fesili ae alo solo mai le tali ae le tali sao mai, i, le pau o le tau o le eletise, uma, pau lena le mea lea e ala ai ona.....

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, e ala ona le avatua le tali, ona e

manatu o lena e te malamalama. O lea ua toetiiti pei o le tali fesili a tamaiti aoga e aumai le fesili e manao e i atu. E tataua ona faamatala ia malamalama atili. E le fou nei mea.

FOFOGA FETALAI: Ou te manatu ua malamalama le mataupu, faaiu mai le saunoaga le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai. Lau Afioga i le Fofoga Fetalai, e 66 tagata o le aufaigaluega na tuli a le EPC, o le uiga lena na ala ai ona fai atu manatu ia, a, ae e i ai ae leaga o lea ua uma le taimi ae o le ala lena na ala ai ona fai, o lea e fai mai e fai ni sui e fai ni sao o le a se sao a le EPC o lo o i totonu o le Matagaluega.....

Afioga Hon Manualesagalala Mati Tuigamala Enokati Posala: Lau Afioga....

FOFOGA FETALAI: Ua ou maua le finagalo, malie le Afioga i le Minisita mo Galuega, Felauaiga ma Atinae Eseeese o lea ua faauma mai le saunoaga, ae tatou o i Mea Taitasi, ae faaiu mai le saunoaga le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga ou te ava tele i lau Afioga, ae le i faauma atu e toe tasi lava le mataupu lea faamolemole i vai tumaoti foi lea se i tagai ane lau Afioga i le Minisita se i faamama lelei nai vai tumaoti ia, aua o lea e tele seleni o lo o alu ai, aua o vai lava ia e tataua ona tagatagai i ai leaga o le tele o vai lea ou te vaai i ai e le fetai e le mafai ona feinu ai e le fetai o la e taumamafa ai le atunuu, se i tagatagai i ai, ma le faaaloalo lava.

FOFOGA FETALAI: Malie, se i tuu atu la le avanoa leaga o le mataupu lea na.... Tulai maia lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, o lea o le a fai foi e le sui usufono a le Tautua le mea sese lea o le tuuai o le Malo i le tulaga o vai tumaoti lau Afioga, ae pei lava ona ou faailoa atu, o la e taoto le faatuatua a le Malo i le aufaigaluega ma ofisa e feagai ma latou galuega ia, o le komiti o le vai tumaoti e galulue faatasi ma le vaega o le vai lea a le Faalapotopotoga o le Vai, o le SROS ma le Matagaluega o le Soifua Maloloina. E fai lava la pe tai masina ma fai le test foi lea, e ave lava i ai samples i Faalapotopotoga ia e i ai latou masini e test ai le vai. O le faamoemoega lena o le Malo o le tausaga lena i le faamoemoega o le Malo mai le 10 tausaga talu ai, e taumamafa vai mama uma, vai mo le soifua maloloina e tausisi ai le soifua maloloina o le atunuu i vai tumaoti. O le mea la lea i le faamaoniga a le sui usufono, a i ai sona faamaoniga, ia aumai nei, aua e fai si matuia o tuuaiga, ae ou te tapa e aumai sana faamaoniga. Afai e leai se faamaoniga, tuli loa e alu i le fale e malolo ai, leaga o mea faapea, e tuuaia ai le tatou Malo, ae o lena e taumafai le Malo i le mea e tataua ona fai mo le soifua maloloina o le mamalu o le atunuu.

Ma lou faaaloalo, o la e molimau vai tumaoti e ala i komiti o afioga e vaaia ma pulea nei atinae faatasi ma le lagolago malosi a le Matagaluega.

FOFOGA FETALAI: Malo. O le mea lava lea le sui usufono mamalu, na ou tapatapa atu lava ua maea lou taimi, ne i avea lou naunau ma mea e... afai foi la e tapa finagalo, ona tele lava lea o le felefele o le tatou mataupu. O lea ua logona lou finagalo, o lea ua saunoa manino le Afioga i le Minisita, o lo o i ai le tafatolu o e o lo o galulue i le falemai o le SROS ma le pule mamalu a alii ma faipule e fua i ai lou atugaluga. Ae faafetai atu, faaii maia le saunoaga Aveau.

Tofa AVEAU TUALA LEPALE NIKO PALAMO: Lau Afioga i le Fofoga Fetalai na o sina tamai tali atu lava i le vaega lea.

FOFOGA FETALAI: Aua ia Aveau o lea ua... Malie e faaauau mai le saunoaga ne i te i ua toe lagalaga le mataupu.

Tofa AVEAU TUALA LEPALE NIKO PALAMO: O le tele o vai ia ua uma ona ou oo i ai lea e ala ai ona fai atu le lauga lenei, ae masalo o le a taatia atu o lena ua silafia e lau Afioga, a e manao e avatu faamaoniga o le a avatu.

Faafetai i lau Afioga i le Fofoga Fetalai. O le vaega lea i le Tala o le Tupe, e fai foi sina faanoanoa i le Matagaluega o Tupe, ona o le le atoatoa o le Tala o le Tupe. O le tele o vaega e misi mai le Tala o Tupe, ae masalo e i ai se taimi e faamalulu atu ai i lea vaega i lau Afioga i le Minisita ma le Matagaluega. Afai foi e i ai se manatu ua sala, ia o manatu lava na o le faipule mo Faleata Sasae, e le o se faitio, e le o se faaleaga po o se loto eleelea, e leai o le fautua. E leaga e le o se galuega na o outou o le galuega a tatou uma e fai faatasi. Ia alofa le Atua e foai atu le manuia i le Afioga i le Minisita aemaise foi le Palemia ma le Kapeneta aemaise Minisita Lagolago aemaise foi lenei Vaega faapea Ofisa Sili o Pulega ma Pule Sili faapea foi le faafogafoga a Samoa. Ia manuia lava le mamalu o le Palemene. Ma lou faaaloalo lava.

FOFOGA FETALAI: Malie lava lau Afioga i le Taitaifono o le Komiti o Tupe Maua ma Tupe Totogi se i avatu le avanoa i le Afioga i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, e i ai lava si mea lea e faalavelave i a tatou felafolafoaiga. Lau Afioga i le Fofoga Fetalai, o mea ia e fesili atu ai le Itu lenei, o mea o la e fia malamalama ai le Itu lenei, ae pei e foliga mai e tetee le uluga i lena Itu aemaise lau Afioga i le Palemia ma le Kapeneta pe a fai atu fesili. O le mea lea...

FOFOGA FETALAI: Tuu mai o lea o le a faamalamalama atu Palusalue.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e ala ona matou tulai atu e faasao manatu ia e i tua o fesili. Ia manatua foi tua o fesili, o la e i ai manatu faaoloataua. Se ou te le i faatoa faipule nei ananafi, e le i uma mai lau amataga ua leva ona ou tilotilo mamao atu i le mea lena e te agai i ai. Tatou te

iloa uma lava fealofai solo i mea o fesili. O le ala foi lena o lea ou te tali sao atu ai i le mea tonu la e nana i tua. O le tatou Maota nei, e i ai le Tulafono faatatau i saunoaga faauigalua. Tele ia o faauigatolu lea e sau. Ua le faauigalua a ua faauigatolu. E sau la le fesili ua leva ona tilotilo uma atu i ai i le mea lea e sau mai tua.

FOFOGA FETALAI: Se i tulai mai lau Afioga i le Taitaifono o le Komiti o Tupe Maua ma Tupe Totogi.

Susuga Hon Papaliitele Niko Lee Hang: Faafetai i lau Afioga i le Fofoga Fetalai mo le avanoa. E leai ua ou tulai atu ma le agaga faaaloalo ona o le saunoaga a le sui usufono lea na mavae atu i lona tuuaiga lea o le Matagaluega o Tupe. Mo le silafia e lau Afioga ua uma ona faamalamalama i le tulaga o le sese lea. O le tulaga foi o le le sao lea na faamanino lava, e tasi le page atoa o le faapapalagi na misi mai totonu o le Lipoti, na o le pau lava lea. A o nisi mea pei ona saunoa le Afioga i le Palemia, o typing errors. E leai la se mea o faaletonu i le auaunaga a le Matagaluega, o la e sao lelei lava. Ae momoli atu ai lau faafetai e tele le galuega a le Matagaluega na fai, ae pau lava o nai mea laiti ia e mafai lava ona faasao. Ae a faamatala foi le sese, ua uma ona faamatala. Ma lou faaaloalo lava.

FOFOGA FETALAI: Malo faafetai. Tulai mai lau Afioga i le Minisita mo Tina ma Tamaitai, Atinae o Nu'u ma Afioaga ma Agafesootai.

Tofa Hon Tolofuaivalelei Falemoe Leiataua: Faafetai lava i lau Afioga i le Fofoga Fetalai ma le paia foi o le Maota ma le faafogafoga a Samoa. O au nei ou te atugalua lava i le Taitai o le Itu Agai ona ua loa ona i totonu o le Palemene, ae foliga mai o le loa ona i ai, o le aveesea foi lena e le Atua o le tofa mai le Taitai o le Itu Agai e malamalama ai mea e fai i le Maota ma Tulafono Tumau. O le mea lea e fesili soo mai ai, e i ai le vaega o le Tulafono Tumau e aumai ai fesili ma tali sao a le Minisita, pe tali tusitusia pe tali tuufogoga. O le mea lena o la e i totonu o Tulafono Tumau. O lauga faalauaitete, e leai se obligation e matua tuli ai le tafue le la e vanevane mai e latou.

O le mea lea lau Afioga i le Fofoga Fetalai, na o mea lava e manao e faaoloataua ai le faafogoga a Samoa. A o lea ua ou tau atu i le Taitai o le Itu Agai, vaai Tulafono Tumau, a e fia fesili, avatu le sao, e i ai mea e faamau ai tali a le Malo ona e fesili loa lea, fesili ma tali. O le manaia ia o le vaega lena o le Tulafono Tumau e faafogoga ai Samoa i le mea lea e te moomia ma le malamalama lea e i le Kapeneta, leaga o laua uma Minisita o le Kapeneta o le atunuu. Ma lou faaaloalo lava.

FOFOGA FETALAI: Malie Palu, o lea ua ou maua lou finagalo.

Afioga Hon Palusalua Faapo II: Lau Afioga i le Fofoga Fetalai, o lea e ia te oe le tofa ma le faautautaga e pulea ai le tatou Fonotaga, a o lea e pei e foliga mai e faasao mai e o.

FOFOGA FETALAI: O lea ua ou maua lou finagalo.

Afioga Hon Palusalue Faapo II: O lauga e taumafai atu i i, ae liliu e o fai mai o polokiki eleelea ma le palapala ma le a ma le a.

FOFOGA FETALAI: O lea ua ou maua lou finagalo, o lea o le a fai atu lau tali Palu. O lea ua manino, malie Aveau o lea ua manino le mataupu. Silasila foi i le tuuavanoa lea a o lea o le a tauau e oo ai le isi tulaga ona o le ava atu ma le tuuavanoa atu. E le mafai foi ona tuumamaina e le Malo le taumafai atu e faapulapula le mataupu. O le aoga foi lena mo nisi o sui usufono o lo o saunoa ma ia finagalo malilie sui usufono ua tele le mea lea ua uma ona ilo taga a tautai i aso nei, ua tele mataupu ua faailoa ma manino, e le tatau foi ona toe asaasa i lauga. O le ala foi lea o le toe tulai atu o le Malo e faapupula pea tulaga o agai i ai saunoaga a sui usufono. Malilie sui usufono, o le ala lea o le tuuavanoa atu, a ua avatu ai ma le tulaga ua atagia ai o le a taufai alu pea le tagatasi o lauga ua uma ona tali. O lea ua manino ma malamalama le tatou mataupu, o le a faagasolo le tatou Fono.

Tofa Lealailepule Rimoni Aiafi (Faleata Sisifo): Lau Afioga malie lou loto, se ou te fia faasaoina le saunoaga a le Afioga i le Minisita, fesili tusitusia. Lau Afioga, ua e tagai mai o faila nei o matou fesili, o lea la o le a faaoo atu e fesili mai ai lau Afioga, ua leva tausaga e le i toe faia ni fesili i Aso Tofi. Ma lou faaaloalo lava.

FOFOGA FETALAI: Manaia. Ia, Aveau.

Tofa Aveau Tuala Lepale Niko Palamo: Lau Afioga i le Fofoga Fetalai, ou te fia agai atu i le saunoaga a le Afioga i le Taitaifono, o lea e faapea mai i i. O le uiga o lau faamatalaga na avatu i totonu o le Tala o le Tupe, o le tele ia o mea ia e le o sao i totonu o le Tala o le Tupe o lea e misi. Ana faapea o lea e misi na o se vaega, pe misi le sipelaga o upu po o se isi mea, ae misi lava le itulau atoa.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai lava le mea lea ou te fia talanoa atu ai, o le mea lena e ala ai ona fai a tatou Komiti e pasi i ai tatou Tulafono. E 14 aso o sailiili. O e foi o lo o i totonu o Komiti, o isi ia sui usufono, o lauia i mataupu tau tupe. Latou te silasila i ai. O mataupu ia tau Faapalemene. A silasila i le tatou olaga o lo o i ai, e leai lava se atoa. O le ala foi lena ua ala ai ona faatu Komiti e toe silasila i ai i ni lape, ona faasaosao ai lea ma faatonutonu e latou i le toe talanoa ai ma Matagaluega. E faapena uma lava tatou Tulafono. O le ala foi lena na ou tulai atu ai foi ma ou fai atu, e le o se mea fou le mea lea o le mea masani ae pei o le a tauau tatou te faapea o se mea tele. O le tulaga masani, e 14 aso e iloilo ai e le Komiti ma tatou uma le Tala o le Tupe. Ae le 14 la aso, e tolu vaiaso lea na tuuavanoa atu ai le Malo i le Komiti ina ia atoatoa le latou galuega ma fesoasoani atu ai ia i tatou uma. A tatou tilotilo foi la tatou o i ai ni faaletonu, o lea foi e i ai le tulaga ia i tatou, tatou te iloa ai lava se mea o faaletonu, ona faasao lea. Nei la, e le o suia ai lava le aoatetele o le summary o fuainumera e leai se mea e tasi o sesē. E pei la o tulaga na e i ai lava le taimi, pe alu alu lava le masini misi se

pepa se tasi, misi atoa a o la e sau lava pepa latou. E le o se mea fou, e tele lava fonotaga ou te auai, e tutupu ai mea faapea, e sau lava pepa e i ai pepa e misi. Ia, e i ai mafuaaga ae le faapea o le a soona tuuaia ai le aufaigaluega i tulaga faapena e tulai mai.

A outou silasila foi i aso nei, o aso nei, ua tele ina faatino e masini galuega. O lea foi e oo lava i le Malo tele o Amerika ua faapena. O le Malo tele o Amerika e te maua i ai Saienisi aupito atamamai i le lalolagi, a o le a le mea lea e tupu? Na o le faatulaga lava seki le aso e fana ai se roketi ae fana atu ae pa, oti tagata. O Amerika le atunuu alualu mamao aupito sili ona maoae le latou spy organisation, ae felelei mai lava i latou faatupu vevesi pomu le fale aupito tele i Niu Ioka. E i ai mea faapena e tutupu i lo tatou soifua a o lea e i ai auala e faatino ai lava i totonu o le tatou ala o mea. O lea ua manino mai le saunoaga a le Taitaifono, o lea e manaia lava lana saunoaga o lea e sosolo lava i luga o tatou galuega. E faapena lava le i ai o le lē atoa. A oo foi i le taimi na tofia ai oe e avefa oe ma Coach o le Manu Samoa mo le Test ma le Olopeleki. Sa i ai lava ou faaletonu i le mea na ala ai ona vave faamalolo oe. O ituaiga mea faapena, e tofu lava le tagata ia ma ona faaletonu, ae i ai lava auala e faasaosao ai.

FOFOGA FETALAI: Malie Aveau.

Tofa Aveau Tuala Lepale Niko Palamo: Lau Afioga i le Fofoga Fetalai, ona o lea ua oo i le mea sa ou le fia oo i ai. O lea ua oo tonu lava le Afioga i le Palemia i le mea lea o le faiga o taaloga. Leaga o le mea lea e saunoa i ai le Palemia, o ia lava e sese.

FOFOGA FETALAI: Leai, malie le sui usufono o lea ua ou maua.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga, leai. E 4 masina na logo ai oe i le Test a le Manu Samoa ma le Olopeleki – ina ua tofia oe e te tapena mamao i ai. Ae o lau tapenaga na fai toe lua vaiaso ae faatoa fai. Tau lava ina faataunuu. Faapefea ona faapaole au tapenaga o lea e tapuai le atunuu? Na matua atagia ai le lē faamaoni.

FOFOGA FETALAI: Se faataatia mai o lea ou te avatua le avanoa. Palusalua, taatia mai o lea o le a ou avatua le tatou mataupu.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o mea o faataitaiga, e tofu lava le tagata ma ona lape. E i ai le tatou upu foi lele, "E potu lava le tautai ae i ai le taimi e sese ai lana atu." Si tamai atu lava lea na ou tau atua ananei ae e tu ae ai fua, ae na o au lava ma Aveau e malamalama ai?

FOFOGA FETALAI: Ia, malie Palu, malie foi Aveau o lea ua ou maua lou finagalo. A i ai sou ava mai i le tatou Maota o lea ua ou faauma atua le tatou mataupu. E talitonu foi ia vaatele i outou finagalo tuleiga ma saunoaga, o le ala lava lea o lou maumau iumaea atu i saunoaga o lenei aso. O lea foi ua taua lou finagalo na tuuina mai o lea ua tali manino le tatou Malo i le tulaga e tataua ona i ai. O lea lava na ou faamalulu atu e tatao mai i le moa o le ala le

tatou Fono. O lea foi la ua taumafai atu le Malo e faapulapula mataupu, ave ia lea i uta. E talitonu e le o ni ai avea po o se tulaga e faataumatatao, e taumafai atu foi e faapulapula le mataupu ona o lo outou foi naunau mai ina ia faataatia i lagatonu mataupu o lagalaga mai i outou finagalo. E tiga foi tuuaiga sa amata ai le tatou Tala o le Tupe, na amata lava i le vaiaso o le tatou Fono le mataupu lenei, ua faalua, faatolu, faafa i lenei taeao, o taumafai mai pea le Taitaifono, e leai se mea e tasi o faaletonu o le tulaga o le Tala o le Tupe na tuuina mai. O lea foi ua saunoa le Afioga i le Palemia, o aga na a le tatou Komiti, o le galuega lena e silasila mamao i ai fofoga o le Komiti ma tatou.

O lea foi ua saunoa le Palemia, o ala na a le tatou Komiti, o galuega na e silasila mamao i ai fofoga o le tatou Komiti, ma tatou, o lea foi la ua ave lo outou manatu ma lo outou lagona, o lea ua saunoa le Komiti, o aulape ma sasi o tulaga o mea tau typing aemaise ai foi o mea ua le mafai ona faaauuina ona o lape o le vaai, ae o lo o atoa pea le faamoemoe o le Lipoti na tuuina mai.

Ou te manatu ua taatia i lagatonu ma sagatonu lau o le fo e ala i finagalo sa folafolaina e le sui usufono. Ona o lea ua tatou tulalata i le tatou taimi malolo, ou te manatu ua tatau ona vasai foe i lenei taeao ae fai se tatou malologa ona tatou taliu mai lea i le tatou malologa masani.

Ou te faasilasila atu o le a faataatia ese Tualumaga a le Fono Aoaio Faitulafono mo lana malologa masani o le taeao.

Na faataatiaese Tualumaga a le Fono Aoaio Faitulafono mo lana malologa masani i le itula e 10:39 i le taeao ma toe amatalia i le itula e 11:25 i le taeao.

FOFOGA FETALAI: Ou te faasilasila atu ua toe amataina nei Tualumaga a le Fono Aoaio Faitulafono.

E maualuga le faamoemoe ua tatou taunuu mai i le vaega o le tatou Fonotaga i lenei taeao. E i ai foi le agaga ua maea le tatou taumafagati, ma ua maua foi lo outou malosi i le tino, e faaauu ai le tatou galuega i lenei vaega o le aso. E mavae le tatou malologa ua maea ona saunoa le sui usufono mo Faleata Sasae. O tulaga masani lava o le tatou Fonotaga, e avatu pea le avanoa i tulaga o tuleiga ma saunoaga. Ao le fautuaga lava ia a le Fofoga Fetalai, ia outou finagalo malilie sui mamalu, ia tausisia le tatou taimi aemaise foi o mea e lagalaga i finagalo. E talitonu foi o lea ua tele ina logona finagalo o sui usufono ua taatia i le Maota. Ae fautua atu foi ina ia tausisia le tatou taimi aemaise o mataupu i tulaga o fetufaaiga ma le taumafai foi o le Malo e tali atu. O a foi ni tulaga i le suaga i le vaatele ma upu ma tala, ia o fale nei, aua foi nei lagona le agaga o le tulaga o le faafetaliaiga po o le faataumatatao o faamatalaga, ae manatu tatou te matua lava i le o o ma le tausiga o le tatou va nonofo ma le va fealoai ma le va faafeagai ai. Ua avanoa le Maota mo se sui usufono e fia saunoa.

Malie lava le sui usufono mo Gagaemauga Nu 2, o le a vavae foe mo lea itu o le Maota o le a lafo atu i le sui usufono mo Siumu, ona toe lafo atu foi lea i lena itu.

Tulai mai le sui usufono mo Siumu.

Tofa Hon TUUU ANASII LEOTA (Siumu): Faafetai i lau Afioga i le Fofoga Fetalai, ua maea foi le palegaauau ma le taliga o le sua i le paia maualuga i le Maota nei aua foi se faasiligamalosi.

Ae momoli atu ai le faafetai ma le faamalo i lau Afioga i le Fofoga Fetalai ma le Failautusi o le Maota aemaise foi o le Ofisa o le Fono. E faafetai atu mo lo outou maau ma le milosia o lea ua maea ona tali le sua i le Palemene nei. Sa leai se manatu e fai se lauga. Ae ua ou tulai atu i lenei itula, sei fai foi se manatu puupuu e tusa ai o le Tala o le Tupe.

Ou te faatalofa atu i le Fofoga Fetalai, faapea lau Afioga i le Palemia ma le sui Palemia, Minisita o le Kapeneta, Afioga i le Taitai o le Itu Agai, aemaise foi o le paia maualuga i sui filifilia o le Palemene o le Malo o Samoa. Se taimi oo lau faamatalaga i le tapuaiga a si ou itumalo. Ua ou tulai atu i lenei itula, na o viiga ma faafetai i le Malo lea o le a ou faia. Faafetai i galuega ua maea ona fai ma faatinoina aua le manuia o Samoa ma ona tagata.

O lau faafetai muamua i le Minisita o Tupe. I le vaavaai atu foi i le tatou Tala i le Tupe, e ui lava ina faalelava le faasoia ae o lo o faapena lava ona i ai le manatu e faapena ona faatinoina vaega uma e manuia ai le atunuu e ala lea i le Matagaluega o Aoga ma le Matagaluega o Soifua Maloloina. O lau faafetai muamua lea. O le lua o faafetai o le faafetai i le Komiti o le Tutoatasi, ina ua valaauina lou itumalo e faafiafia i le Tutoatasi ua maea atu nei. Faafetai i le Afioga i le Taitaifono, e ui lava ina faalelava le seleni ae faafetai lava, ua oo mai lenei itumalo e faafiafia i aso fiafia o le tatou Malo.

O le isi au faafetai e faafetai i le Malo, e ala atu i le Matagaluega o Aoga Taaloga ma Aganuu, aemaise foi o le fesoasoani a le Malo o Ausetalia. O lea ua maea ona toe fausia faleaoga o le matou Komiti o Palalaua, lea na faaleagaina e le afa o Evani. O lea ua uma ona umusaina i le masina o Aperila o le tausaga nei. Faafetai ma faamalo. O le isi au faafetai, ou te faafetai i le Afioga i le Palemia ina ua talia talosaga a lenei itumalo aua le fausia o le matou faleaoga tulagalua i Siumu o lea ua faapena ona fausia nei i le agalelei mai o le Malo o Saina. Faafetai i le Palemia ua ia talia mai le talosaga, masalo o le toatele lava o a outou Afioga o lo o feafifio atu ma silasila i ai i le faleaoga lea o lo o fausia nei, o se faleaoga maoae ma e tulagaese. O lea ua fuafuaina e umusa po o Setema po o Oketopa. O lau vaavaai i ai i le fausia o lenei faleaoga, e toetiiti lava tutusa le agai i lalo o le faavae ma le alu agai i luga. O lena ua outou silasila i ai o le matua malosilasila lava o lenei faleaoga. Ae faafetai ai i le tulaga o le aoga o le faleaoga i lenei itumalo aemaise foi o itumalo tuaoi.

O lau faafetai lea i le Afioga i le Palemia. O mea ia a soo se faipule lava e tulai mai ma oo mai i totonu o le Palemene lenei. E oo mai loa i totonu ona faataoto lea, talosaga ma tatolo loa i le Malo, ia alofagia mea nei, o faleaoga aualagalua o taligalu eletise faapena foi ma le vai. O le faafetai lea i lau Afioga i le Palemia ma le Malo e tusa ai o mea ia ua ou taua e fitoitonu lava i lenei itumalo. Lau Afioga i le Fofoga Fetalai masalo e molimau lau Afioga ma le mamalu o le Palemene lenei, e ala ona ou tulai ma fai lauga i le Tala o le Tupe uma lava, ona o talosaga i mea e moomia e lou itumalo. O lea la ua uma ona fai lau faafetai ao lea o le a fai lau faasea. E faasea tonu lava i le Minisita o Galuega ma Felaugaiga ma Atinae Eseeese.

Lau Afioga i le Fofoga Fetalai, i le amataga mai o le nofoaiga lenei, o le 2011 o lau lauga o auala galue o Saaga ma Maninoa. Ua le aoga la i le taimi lenei, e le o se talosaga la ae o upu ina ia faamauina o au galuega ua le faia i

totonu o le paeaiga lenei. Aua o se upu i se toe talosaga i le taimi lenei, ua leai se faamoemoe o lea ua fai mai le Minisita ua uma ua tapuni.

O le auala lea e i Tiavi agai atu i Siumu ua masofasofa uma lava i le afa o Evani ona o le malolosi o tafega. O lea e saunoa soo ai le Minisita e \$7milion na faaalu ai. E sao, aua o le mea e tataua ona fai e feoai ai le atunuu, o le fesootaiga lea, o matu i sasae e agai atu ai i Siumu, Falealili ma atu Aleipata, Safata ma Lefaga.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai..

FOFOGA FETALAI: Malie le sui mamalu o lea sei avatu le avanoa i le faauilavea a le Afioga i le Minisita. Tulai mai lau Afioga.....

Afioga Hon Manualesagalala Mati Tuigamala Enokati Posala: Faafetai i lau Afioga mo le avanoa. Ou te manatu e tele lava ina lagalaga lenei mataupu o tatou aualagalua. Ae e lelei ona avatu se matou vaavaai. I le tulaga i le tatou paeaiga lea sa i ai, maumau pe ana faapea e..... e i ai mala faalenatura e i ai taligamalo, o iina sa faatino ai galuega 2011, 2012 sa ave le faamuamua i le tapenaga o le 50 tausaga, o lona uiga o nai vaegatupe sa i ai ua faatino ai, ae sa fuafua lava a tatou galuega e faatino aemaise lava aualagalua. O le tausaga 2012 i lona faaiuga na afaina i tatou i le mala o Evani, lea ua saunoa i ai le sui mamalu. O le tulaga foi o tupe sa fuafuaina o lea sa agai i le faaleleiga i le taimi lea e le gata i auala ia o Fagalaoa, o auala mai Siumu e tau mai i se vaega o Safata, e tilotilo i le \$15milion sa faatino ai galuega ia. O galuega uma ia na afaina i totonu o Evani.

O le 2013 i le 2014 o a tatou taligamalo lea a le SIDs lea sa fai. E tele foi tapenaga e tau i le malaevaalele, tau agai i Tuanaimato i le mea sa faatino ai galuega. E faapena foi auala i faletalimalo sa vaavaai i ai, aua o i sa nonofo ai le tele o le au usufono sa mafai ona agai mai. O lona uiga a tatou fua i ai, o le talaaga lena o le tatou paeaiga, i tulaga i galuega sa faatino. Ao le tele ia o galuega o lo o taumafai i ai.

O Siumu, e to lou pulou i le sui usufono o Faleata Sisifo, o lea sa manino mai e le gata i mea saa o auala uma ia o lea e fesootai agai i le itumalo ma le atunuu. Aua o Siumu e amata atu lava i Avele e tau i Siumu. Sa taumafai e faaleleia, ae ou te iloa ua tele le suiga o tulaga o auala ia. Ae o lo o faagasolo lava le tatou polokalame. O lea foi sa toe fausia mai, mai le magafa lea i Siumu agai i se vaega o Safata, la foi ua tele le suiga o ia auala, o lona uiga e le o nofonofo ai le pulega o Felauaiga i luga o alatetele, o le taumafai lava ina ia faasoasoa nai a tatou seleni o i ai. Ae pei o lena e agai lava faapena.

O lo o taumafai lava mai lea taimi mai lea taimi e faatino a tatou galuega, aemaise lava i auala galua. O le aualagalua lea e saunoa i ai le sui mamalu, e i ai nuu e lei vaai lava latou i le ta i o latou aualagalua, o upu tautino ia e fai atu, o iina lea e tau faasolo i ai.

E i ai afioaga ua faatamala tele, ua faatamala i le vaai o auala ua uma ona faata, ae ua leaga. O le galuega soosoo tauau a le Malo, kamupani o lo o faatinoa galuega ma le pulega a alii ma faipule, ina ia vaai tausia galuega lenei. Ae e le oo tele atu le tatou polokalame lea o le faaleleia o auala ma le faamama i o tatou auala galua ia. Ae e vasi ai loa le tatou vaai ma silasila i ai

alii ma faipule, ona tupu ai loa lea o le faaleagaina. O le auala lea e saunoa i ai ia...ona o le auala ua uma ona fai, o la sei tau faagasolo atu, ae manatua foi o le mea lenei sa naunau i ai le tupu o Tavita. Na manao le tupu o Tavita na te faia le malumalu, ae fetalai i ai le Atua, “e leai e faia e lou atalii, sei tulai mai Solomona faatino”. O isi galuega e faapena, e le o lenei paeaiga, ne’i te’i ua tatou fufusi tele i ai, ao le isi paeaiga faasolo agai i luma, ia fai e tatou lava. Ma le faaloalo.

Afioga Hon Palusalua Faapo II: Lau Afioga i le Fofoga Fetalai o se mea e fia faasao.

FOFOGA FETALAI: Sei tulai mai...

Afioga Hon Palusalua Faapo II: E tele le tuuaiga lea e tuuaia ai le atunuu i le faatamala i le vaaiga o auala, e pei ona saunoa le Minisita. O auala e pau lava e le lelei le fausiaina. O vai ma mea e aafia ai le auala, ae e le o le tuuaia o le pule mamalu a alii ma faipule o latou ua faatamala. O la e faalogologo mai matai o nuu, o lea ua tuuaina i latou e tusa ai ma auala nei e leaga.

FOFOGA FETALAI: O lea ua ou maua lou finagalo. O le mea muamua e tatau ona ou faamanino, ou te taofi o lau Afioga i le Taitai o le Itu Agai ua e malamalama e tatau ona ou faamalosi le itu lea, e le mafai ona e faauilavea i se faauilavea. E te faauilavea i le o lo o saunoa. E tatau ona faamanino le mea lea ma le umi o le tatou Fonotaga. Tulai mai lau Afioga i le sui usufono mo Siumu e faaauau le saunoaga.

Afioga Hon Palusalua Faapo II: Lau Afioga i le Fofoga Fetalai, na ona ou faaoololoma atu, o au o le Taitai o le Itu Agai. E le tatau ona... e tatau ona tuu mai le avanoa e faamalalama ai mea ia aemaise o lea e aafia le atunuu.

FOFOGA FETALAI: O lea ua ou maua. O lea lava ou te tuu atu mataupu uma e faamalalama. Silasila foi o lea lava ua agai ina lotea fua le saunoaga a Tuuu o lea e agai tonu i le Minisita. O lea foi e taumafai le Minisita e tali ona fetalai lea. Se i tulai mai Manua.

Afioga Hon Manualesagalala Mati Tuigamala Enokati Posala: O le taimi ae ou te le i oo mai i le Maota lenei, sa ou lotolotoi i totonu o matou faiganuu a alii ma faipule, o la e faafofoga mai, o le mea lea sa ou aveina i ai, matou te o e faatau mai ni tagasima, o le auala lea i Lotofaga ua uma foi ona fai. Ou fai atu, tatou o e faatino le tatou pitolaau, aumai ni tagasima e o taulelea e faatino ai o la e tele galuega a le Malo o lo o faatino. O le mea sili ma le faafetai o lea ua oo mai ia matou. Ou te tautino atu, e i ai nuu ia o matou, o Saanapu faatoa fai lava lea o se auala galue lea na faatino i le tausaga 2013, ua leva ona... a o se nuu e tele tele lona laueleele ae o lea faatoa faatino. E i ai isi nuu o le matou itumalo e le i faatinoina lava se auala galue, e le i faatino auala galue, ae o lea ou te manatu, o lea e aumai, a e le i totonu o le pulega a alii ma faipule e le malamalama mea na. O le feau foi lea e aumai i galuega ia e tatala, fai le galuega a alii ma faipule, fai le pitolaau a le Malo, lafo atu ia te outou e silasila ina ia galulue faatasi. E faigata tele ona

tau faasoasoai nai a tatou seleni. E pei o le faamalamalama lea lau Afioga i le Fofoga Fetalai.

Afioga Hon Palusalua Faapo II: Lau Afioga i le Fofoga Fetalai, e leai o la e sao le saunoaga i le tulaga e tataua ona galulue faatasi le Malo ma le pule mamalu a alii ma faipule. Ae pau lava le tuuaiga lea ou te tulai atu ai, ua faatamala nuu ma afioaga ua leaga ai auala galue.

FOFOGA FETALAI: O le vaisua tonu lava lea na ou fai atu ai Palusalua, o le vaisua tonu lava lea na ou manao ai e taofiofi le avanoa lea e te talosaga mai ai. Taatia pea o lea ua manino le saunoaga a le Minisita. O le mafuaaga o le saunoaga a Tuuu i lona auala, o lea ua tulai mai le Afioga i le Minisita, o le auala lea o le Afioga a Tuuu, o lea ua uma ona fai. A o le le lelei o le maintain ina o le auala. O le upu lena lea e te maua i le saunoaga a le Minisita. O lea ua manino le folasaga o lea ua faamalamalama ia Tuuu lea ua fetau le faamalamalama o le mataupu lea. Tulai mai lau Afioga i le Minisita mo Tina ma Tamaitai, Atinae o Nu'u ma Afioaga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai ma le mamalu o le Maota ma le faafofogaaga a le atunuu, leai na ona ou tulai atu lava e fesiligia lau Afioga po o le mea o le tiute lava lea o le Taitai o le Itu Agai aua o lea ua faaleo, o le Itu e puipuia lauga a sui usufono. E pei e foliga mai ua see atu Tuuu i le Itu lela i lau lea faavasegaga. Po o le mea lena o lea e tulai ai pea le Taitai o le Itu Agai, ua mamafa lava i le Taitai o le Itu Agai le saunoaga a le Minisita. O lona uiga e foliga mai ua tau see le toeaina lea o Tuuu i le Tautua. Ma le faaloalo.

FOFOGA FETALAI: O le ala lea o lea ou te taumafai e lauama tootoo le Taitai o le Itu Agai, ioe. Alaala pea ia ma faamalumu lona Nofoa, tuu pea le saunoaga a Tuuu o lea e agai i le Minisita, tuu pea le Minisita e tali mai ma fetalai ona fetau lea.

Ia, Leaupepe.

Afioga Hon Leaupepe Tolefoa Apulu Faafisi (Aana Alofi Nu.1): Lau Afioga i le Fofoga Fetalai, leai o le mea e fia faasao i le saunoaga a le Minisita mo Tina ma Tamaitai, o la e teuteu lumafale mai le Taitai o le Itu Agai ia Tuuu ma au ina ia avaga atu o ma loto i le mea la e finagalo i ai, ae fiu e fai mai ma te le minoi i ai i le itu lea. Po o le sao lea Tolofua? Faafetai lava.

FOFOGA FETALAI: Malo. Ia, Tuuu, tulai mai le sui usufono mamalu mo Siumu.

Afioga Hon Palusalua Faapo II: Lau Afioga i le Fofoga Fetalai, faamolemole se i faasao lava le mea lea.

FOFOGA FETALAI: Ia o lea foi o le a toe faasao e le isi faasao le isi faasao, ua atili ai ona sese le mataupu.

Afioga Hon Palusalue Faapo II: Ona o lea ua tuuaia au fai mai o lea ou te alu atu e tauanau laua. E leai, o laua lava, ua leva ona fia o ese ma o, ae ou te le o tauanauina laua.

FOFOGA FETALAI: Ia, o le ala tonu lea, ou te le toe taliaina se faauilavea i se faauilavea. Malie lau Afioga i le Taitai o le Itu Agai, tulai mai Tuuu e faaauau le saunoaga.

Tofa Hon TUUU ANASII LEOTA: Faafetai lava i lau Afioga i le Fofoga Fetalai. Ia o lea ua saunoa manino Leaupepe i le tulaga o maua, leaga e ese le silasila a le Minisita mo Tina ma Tamaitai. O la e foi e tau taofiofi ia o la e foi e tau alu ia. Ae leai sau aia i le to o le pulou o le Afioga i le Minisita mo Galuega i le sui usufono mo Faleata Sasae. Ne i galo i le Afioga i le Minisita, ua uma Tavita, o Solomona lea ua tu atu. O lea la ou te taumafai e fai auala o lou itumalo. Mo lou silafia, o le auala lea ou te talanoa atu ai, na fau i le tausaga 1995. Sa faaletonu lava tatou konekarate fai auala i le taimi lena.

FOFOGA FETALAI: Malie Lealailepule. O ai lea e te fia faauilavea i ai?

Tofa Lealailepule Rimoni Aiafi: O le saunoaga a le sui usufono, ua faalua ona tau lota igoa a o lea ta te nofonofono.

FOFOGA FETALAI: E le o Faleata Sisifo, o Vaimauga Sisifo.

Tofa Lealailepule Rimoni Aiafi: E le o leaga lau faalogo o le matua lelei lava o lau faalogo.

Tofa Hon TUUU ANASII LEOTA: O le sui usufono mo Faleata Sasae lea na ou taua.

FOFOGA FETALAI: O lea la ua faasao mai e le sui usufono, malie le sui usufono mamalu mo Faleata Sisifo.

Tofa Lealailepule Rimoni Aiafi: Na pau lava le mea ou te fia fai atu ai, faafetai lava i le Afioga i le Minisita mo Galuega, a lailoa lava e fai nei galuega, onosai tatou te toe omai i lea tausaga toe fai isi galuega.

FOFOGA FETALAI: Ia, tulai mai Tuuu e faaauau le saunoaga.

Tofa Hon TUUU ANASII LEOTA: Ia, o le tulaga lena e i ai le auala lea, o le matua leaga lava o le faiga, e tolu masina ae malepe, e faaletonu le faiga o le ta i lea vaitau i le 1995. 1995, 2005, 2015, ua uma. O le tulaga lena i le auala lea, pei ona ou fai atu ua leai se talosaga, ua uma ua le toe aoga. Na ona ou tau atu o mea ia.

O le tulaga i le saunoaga lea na aumai, e leai e le taofia ai lau lava faamatalaga, o au lauga, o au upu e fai, leaga o lea e faafofoga mai lou itumalo, o lea foi e taoto i paga le matou savali na alu atu ma le nuu lea o Maninoa. O lau saunoaga, "Taatia mai." E fai lava si ou faanoanoa i lea upu. O le mea foi e popole ai, e i ai isi sa faapea mai ia te au e taatia mai, a o le

mea na tupu, taatia mai ae o atu lava le toe omai. Ua ou le iloa la po o ai o le a faamoemoe i ai.

E pei o le tulaga lena lau Afioga i le Fofoga Fetalai, pei foi ona ou taumafai atu, leaga auala o Tiavi, fau, taumafai lava leaga o le galuega a le Malo e silasila i le feoi o tagata. Na faaleagaina foi auala o Safata, aualatele ma auala laupapa, na fausia foi i le taimi e tasi.

O le mea la lea e tupu, pei ona saunoa le Afioga i le Minisita, e amata atu i Mulivai le fausia o auala ia na leaga i le afa, ae taatia Siumu e i ai isi mea ia na leaga. Ana leai le SIDS ona o faletalimalo, e le toe foi mai Siumu toe fai atu. O le mea la lea e tulai mai e lagona ai le faanoanoa, fai le auala i Tiavi, fai ma le auala i Sataoa Safata, fai ma auala galue o Safata. A fai atu le auala e alu i Siumu ae fai mai leaga ua leaga foi le auala i Tiavi. E i ai auala tai lua i le tai tolu auala ua fai i lenei Paeaiga, a o lea e pulapula atu lenei itumalo?

FOFOGA FETALAI: Malie le sui usufono se i tuu atu le avanoa i le Afioga i le Minisita mo Galuega, Felauaiga ma Atinae Eseese.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, ou te iloa e sese lea saunoaga e tai lua pe taitolu ni galuega na fai. E leai na faasoia, e pei lava o le faasoia foi lele a Selelimalelei lea sa fai i Atua ou te le iloa pe sao lena mea, a o fuafuaga na e i ai. Ina ua moe teitei Malietoa ona saili lea ia Nafanua i Savaii, fai mai, talofa ua uma, ae saili ia i le lagi le ao o lou Malo. O lau vaavaai foi lea i ai, leai o lea e manaia le aumaiga, ae ou te faanoanoa foi o le sui usufono ua leva i totonu o le Palemene, ia mau le tofa, o le a le mea e saunoa i ai, o la e faafofoga Samoa. O lea sa fai i le aso Sa na tea nei, o le ao sinasina foi lele e maitau i ai ma taofiofi e manuia ai nuu ma aiga ma Malo. O le tasi lea ao sina sina o lea e i ai i totonu o le tatou Palemene. O le Tulafono Faaauro lea e i ai, "Ia alofa i lou Atua ma lou loto atoa, i lou uso ia pei o oe lava ia te oe." O le agaga foi lele ia fiafia, a uma ona fai le galuega i i, fai le galuega i i, fai le galuega i i. Afai lava e le talia oe, o la e silafaga lo tatou Atua i le faamanuiaga e tuu ia te Ia mo le agai i luma. Ia taatia mai e le i uma le tatou Paeaiga, ae tatou alo fiafia mo le agai i luma.

FOFOGA FETALAI: Tuuu, o le fautuaga foi lena e avatu i ou tafatafa, ia fai malu le faiva. Ia e faaoleole pei ona faaoleole o le tausala i lana manamea. E talitonu o lena e i ina le tofa i le Afioga i le Minisita, e fai foi o le faiva o pule a o le faiva o faaaloalo, e gau le alofa pe a e faaoololomaau.

Se i tulai mai le sui usufono mamalu mo Siumu.

Tofa Hon TUUU ANASII LEOTA: Faafetai lava i lau Afioga i le Fofoga Fetalai. Leai o lea ta te taaalo i le polokiki, e kiki atu kiki mai. Ou te le o ita ia oe. O ai la lou uso? Leaga la o lou uso au, ae ta te tuaoi foi i tua, ae o lea e te le o faia se mea mo au. Ae faafetai o lea ua e saunoa manino, pei lava ona ou fai atu, e avatu lava mea uma. Malie ia o lea ua see lau fagogo lea e tau fai, o lea e faafofoga mai le Palemia. Na ma talanoa ma le Palemia i le isi a tatou Fonotaga i le amataga o le tausaga lenei, na ou fai atu i ai, lau Afioga, ua ou le iloa i lau Minisita lea po o le a lau mea na galo ai, o lena e te silafia lelei lava, o au galuega uma lava o auala galue, ou te laga i totonu o tatou faafaletui, ae saunoa mai le Palemia, "Aua e te popole, o le a fai lou auala." Ia

o fea la o i ai? Ua ou le iloa la po o ai e usitai i ai. Ana ou Palemia ua uma. A o lea...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, o Minisita uma lava o le Kapeneta, e pei lava o oe, e fai foi loto. A le lelei ona afifi mai lau mataupu e lata mai le tuaau i le mea e lafo i ai. O le mea la lea, a e toe saunoa mai, aua e te saunoa ote, aua e te saunoa faatonu, ae saunoa egeege. Aua foi e fai loto o Minisita, a ita loa le Minisita, na o le pau lava lana mea e aumai, o lea ua i totonu o le lisi. Ae uma atu lava le 2015 e leai lava se mea e faia.

FOFOGA FETALAI: Tulai mai lau Afioga Tuuu.

Tofa Hon TUUU ANASII LEOTA: Faafetai i lau Afioga i le Palemia. O le isi mea lea ou te le i oo i ai, o lea faatoa uma nei lava ona tatala le isi auala o Aleipata. O le atu Aleipata e amata atu i le itumalo o le Palemia, ua ta uma auala e tau i luga o le mauga. O le mea lea o le a tau fesiligia ai le faaso, ae o le a le afaina lea tulaga.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, o mea ia a oo ina faataatia tatou galuega e ave i fafo pei o le afa lea o Eveni, e lavea ai foi la ma i, aemaise e toatele i latou na maliliu. O mea la na e faigofie ona gauai mai ai Faalapotopotoga i fafo. E ui lava ina faapea e mataga, ae o mea na a faalogo mai ua toatele tagata o le itumalo ua maliliu ma faatulaga atu ma fuafuaga e ave i uta le nuu e nofoia eleele maualuluga, ae o la e foi latou te malamalama. Ua ou le iloa po ua ova i le \$40milionua ua alu i le faiga o le auala lea e i Siumu, aua na afaina foi i le Eveni. O le mea lea e tupu nei, a le lelei lata savali, ta te see i le maseese, o le matua manaia o le lamolemole o le auala lea e i Siumu i le alu agai i uta. Aua o Siumu e amata atu lava i Vailima e tau i tua i le magatolu. O lea ou te faitau pe 10 ea auala galue e fesootai ma le main road – o auala galue uma lava, aua o le auala lea e alu atu i Siumu, o le auala o lea e feoai ai tagata lautele e mafai ona faapea o le isi foi auala galue o Siumu, ae na pau lea o le auala e muliga foi le ta la e faata ai New York i le ta lea e faata ai le auala o Siumu. O le mea la lena, ia faifaimalie lau mataupu, leaga o le Minisita lea e i ai nei, o le matua mataala lava. A ou fai atu foi i le Minisita, ae fai mai, "Toeitiiti atoa le 20 o auala o Siumu lea e faataoto." O le mea la lena, aua e te popole, afai e leai sou faatuatua, o le mea la lena e oo i ai, e ta mai lava le logo e leai se isi auala e toe faia pe a leai sou faatuatua. Faatuatua i le Afioga i le Minisita.

FOFOGA FETALAI: Malie lau Afioga leaga o lea sa taua le itumalo o Aleipata.

Tofa Fagaaivalu Kenrick Samu (Aleipata Itupa i Luga): E faafetai atu i lau Afioga i le Fofoga Fetalai mo le avanoa, sa leai foi se lagona e fia faalavelaveina le saunoaga matagofie a le sui usufono mo Siumu, talu ai ona ua taua lenei itumalo pei o saunoaga a le sui usufono i le tele o auala o lo matou itumalo ua uma ona faata, peitai ane, o lea faatoa tasi le auala o lenei itumalo ua uma ona faata, ma lou faaaloalo lava faafetai.

FOFOGA FETALAI: Malo faafetai. Tulai mai le sui usufono mo Siumu e faaauau le saunoaga.

Tofa Hon TUUU ANASII LEOTA: E faafetai atu i lau Afioga i le Palemia o lea ua lava le faatuatua, ae ou te faatuatua la ae faaletonu le Minisita. O lea ou te iloa, ua avea le ma mafutaga ma le Taitai o le Itu Agai ua le faia ai au galuega, Palu, ua e silasila la i ai i le mea lea ua tupu, ae e te fia uo mai fua ia te au ma Leaupepe a o lea e fai lava maua galuega, ia lau Afioga i le Fofoga Fetalai, o le a taatia ia mea. Sa ou talosaga foi i le alavai....

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Ia saunoa, leaga o lea o le a aliali a oulua mea ia e fai soo.

Afioga Hon Palusalua Faapo II: E fautua i le sui usufono mamalu, aua e te popole, o lea o le a ou musumusu i lou uso a sui usufono vaeatu lau Afioga i le Minisita, e fai lou auala lea, a le faia, sau iinei tatou galulue faatasi.

FOFOGA FETALAI: Ia o lea la e maua mai o le Taitai o le Itu Agai lea e tupu ai le faaletonu. Tulai mai le sui usufono mo Siumu e faaauau le saunoaga.

Tofa Hon TUUU ANASII LEOTA: Faafetai i lau Afioga i le Fofoga Fetalai, leai o le alavai lea e i tafatafa o le faleaoga lea na fausia nei e Saina, o lea sa taua e le Afioga i le Palemia i le isi taimi e sao au, a oo ina timuga tetele e matua tafe lava, e afaina la le matou faleaoga lea e fau nei i maumau le galuega nai Saina, ou te talosaga atu i lau Afioga ona o ia tulaga.

Ona ou see mai lea i le vai tumaoti lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, e lelei lava le toe faamanatu atu, o le a ou faatuatua pea o lea o le a gaoioi lou vai, a? Ma lou faaaloalo.

FOFOGA FETALAI: Tulai mai lau Afioga i le Minisita mo Tina ma Tamaitai, Atinae o Nuu ma Afioga ma Agafesootai.

Tofa Hon Tolofuaivalelei Falemoe Leiataua: Lau Afioga i le Fofoga Fetalai leai faafetai i lau Afioga, e faamalulu foi pe afai o le taua lava o lea vaega ma tulai atu le Kapeneta nei, ia ae o le agaga lava ia vave ona faasao. E manatua foi o le mea e le faapea e tau loa, ona fai loa lea, e i ai o outou tiute e fai, e i ai lo outou sao e muamua aumai e tuu i totonu o le faletupe, ia ona faapena lea ona faagaioioi aua e le faia i ni mea o ni oneone pe fai mai foi i ao o le lagi mea ia o galuega tele, o le sisipeni lava e fai ai mea uma, ae o lo o taumafai lava le Malo e tuufaatasia se vaegatupe, ae i ai lava le sao o afioga.

O le mea lea lau Afioga, aua e te popole o lea ua ou fai atu, na ona uma lava o le Palota e vaai i ai ua tutumu sink i tua i le mea o lo o i ai lou vai, pe afai e faatino mea na e lo outou afioga, ioe. Pei o lau fesoasoani atu lea, ae se fai le mea lea ua saunoa atu ai le Afioga i le Palemia, o le faatuatua, a e faatuatua ona e vaai lea e mafuli mai lava mauga i le malosi o le faatuatua lena, e pu foi le vai ma maua le vaitaumafa o Saaga pe a e faatuatua, a o le faalavelave ua

ese le mea lena ua e faatuatua i ai, ua e faatuatua tele i le aufoga uumi ae ua e le faatuatua i lo tatou Matai i le lagi, ma le faaloalo.

FOFOGA FETALAI: Tulai mai le sui usufono e faaauau le saunoaga.

Tofa Hon TUUU ANASII LEOTA: Faafetai i lau Afioga i le Fofoga Fetalai, masalo o le tasi lea o Minisita ua ou iloa ua le sao, o lea faatoa aumai ia te au ia faamatalaga faapea o le mea e tatau ona fai, ae na e saunoa lava i le tausaga lea na tea nei o lea o le a fai, ae o le a taatia atu, taatia ia se i o tatou foi mai, a, taumafai se i tatou toe foi mai i le isi Faiga Palota pe a.....

Ae ua ou see mai i le Ofisa o Leoleo ma Falepuipui, ua matauina pea le faaali i le Televisi i po le sosola ai o pagota, o le mea lea e faanoanoa ai na o le aumai o igoa ae fia iloa e le atunuu ni ata, e tatau lava ona aumai ata ina ia faafaigofie ai i le atunuu ma latou vave logo atu i le Ofisa o Leoleo i tagata ia pe a aumai i le Televisi ae ou te le o maua e faafesili atu ai po o le mea e faasa ona aumai ai ata. O lau la tuualalo, e taua le aumai o le ata, ae o le toatele lava o latou ia e sosola o le au talepe, masalo leaga e tele le aafiaga o le soifua o le atunuu aemaise foi o meatotino ma mea faapena pe a logo mai ua i ai nisi ua sosola e tatau lava ona aumai ia, ae i lou lava talitonuga, e sola loa se pagota i sana solaaga muamua o lona agavaa, e tatou te vaavaai i mea ia ua tutupu mai lea e faaali mai i ata tifaga foi ia e fai mea o shackles ea po o fai mea pei o polo lapotopoto foi ia mamafa, a sola loa le tagata ae toe maua mai, o lona uiga o lona tau lena e loka e le mafai ona toe sola ai, ma le faaloalo.

FOFOGA FETALAI: Malie le sui usufono mamalu, se i avatu le avanoa i le faauilavea i le Afioga i le Minisita mo Leoleo ma Falepuipui.

Afioga Hon Sala Fata Lisati Pinati (Minisita mo Leoleo ma Falepuipui): Lau Afioga i le Fofoga Fetalai, e faafetai atu i le saunoaga malie a le sui usufono. O le tulaga e pei ona saunoa i ai le sui usufono i ata ia, o le mea moni lava masalo o se galuega tele lea o lo o nofo ma au ua uma foi ona fautua atu ia i latou o lo o vaai pagota i uta ia Taito ma le vaega e faasalalau ata o i latou, ua fai la sina lea ona tapena i ai ua ave foi le tuualalo, e sola loa le tagata ua tatau ona faasalalau, e oo mai la i le aso o lea lava ou te nofo po o fea o fai i ai.

Mo le silafia e le Maota, leai o le galuega o le galuega a tatou e fai faatasi, ma e avatu foi se lagona ma se tuualalo i le atunuu, a maua le pagota e silafia lava po o fea o i ai, faamolemole momoli mai, tau mai, aua e le tau tauia la outou galuega fai aua o le Malo o Samoa o tatou o le aiga e tasi tatou - ma o le agaga lena, ia a ave foi mea faapea e shackle ia tagata, ia se i vagana taimi o Roma sa fai ai mea na, a o tatou tu ma aga Faasamoa, ia e i ai taimi o Sadam ma latou, ae leaga o le Faigamalo a Tuilaepa, e ava i tagata o le atunuu o le toto ma aano, ma le faaloalo lava o le a faapena ona fai o le a faasalalau atu i le ea ia ata o i latou o lo o faapena ona solitulafono, ma le faaloalo lava.

FOFOGA FETALAI: Malo. Tulai mai le sui usufono e faaauau le saunoaga.

Tofa Hon TUUU ANASII LEOTA: Faafetai i lau Afioga i le Minisita i le saunoaga foi i le vaega pei e ala ona ou taua vaega nei e tau puipui ai foi lea le sosola ona e le o malu lelei le tatou falepuipui o lo o i ai nei, atonu o lea o le a fausia le falepuipui fou ua ou iloa o le a maualuluga pa ia ma le mafai ai ona toe i ai nisi e sosola.

Ona ou see mai lea i le tatou maketi lea i Fugalei, e vaaia ma le faanoanoa le tulaga foi lea pei e tunoa, ua le o toe i ai le tulaga foi lea pei ona masani ai le maketi tuai sa tumutumu ai le atunuu aemaise le vaitaimi lea sa i ai i luma maota o le Afioga Leaupepe, sa vaaia le tumu o le atunuu ma sa avea o se vaega foi lele e feiloai ai ma le fialia le atunuu. Ou te le o iloa po o le a le mea lea ua tupu i le maketi ua ou le iloa po o le latou tulafono lea e 24 itula ma mea faapena e le mafai ona toe fai ai ni faleaiga, o isi vaega ia e fautua atu i le Afioga i le Minisita, se i silasila totoa ane i ai ina ia vaavaai se auala e fai ai, aua o lea foi ua le o toe faatagaina i latou ia e faatauina a latou oloa i vai auala foi lea e....ae i le tulaga lava ia i fefaatauaiga nei, ia pei o le faiva foi lea i le faifaiva e fagota a e iloa lava le mea e te mautinoa e tele ai le ia, e te asiasi lava i ai i le tele o taimi, e te le mafai lava ona e misi, e faapena foi la i le au faatau nei, e le mafai lava ona o nofononofo i se mea e iloa e leai ni tagata. A ou vaai i Saina e feoai tagata foi ia i latou uila vilivae foi ia o isi e o i le mea e i ai fata, e vilivili vilivili lava i le mea foi lea e tumu ai tagata i le mea e maua ai faatau, tu loa, seki loa i ina, ia.....faatau ai loa i ina.....

O se faamatalaga lena i le vaega lea i le tatou maketi, maimau pe ana toe tatala faa-24 itula, leaga o la e fai sina maotua i mea faapena e le o mafai ona uia e pasi ma.....atonu e i ai e taimi ona toe silasila atoa i ai le Malo ina ia lelei le tupe maua aua o le mea lena pei e le o o foi nai tagata e faatau ai a latou oloa ona o le tulaga lena. Masalo ua maea ai lau Afioga i le Fofoga Fetalai ia ni manatu foi e fia faaalua i le tatou Tala o le Tupe i lenei aso, ae momoli atu le faamalo ma le faafetai.

Ae fia pai i le tapuaiga a si ou itumalo, le paia ia Sa Asomua ma Aiga, lau fetalai Tuuu ma lo outou aiga Sa Tuuu, le Falelua o Tulafale, Fofoga o Alataua, Utaileuo ma le mamalu i le Faletolu, aemaise foi o le paia maualuga i susuga i Faafeagaiga o lo o faapena ona faafalelemalu i totonu o lo tatou itumalo, aua le tauasuina o le Ipu o le Ola, ia saga maua pea ni Agaga aua le manuia o le tatou itumalo. Ia o le faamatalaga lea lau Afioga i le Fofoga Fetalai, faafetai tele mo le avanoa ia manuia le tatou Fono.

FOFOGA FETALAI: Malo, malo faafetai saunoa i le sui usufono mamalu mo Siumu, malo le fetalai malo le saunoa i lenei vaega o le taeao.

Ia tulai mai Saleaula le sui usufono mo Gagaemauga Nu. 2.

Tofa LEVAOPOLO TALATONU (Gagaemauga Nu. 2): Faafetai i lau Afioga i le Fofoga Fetalai ua maua se avanoa e avatu ai foi se vaivaiga o lenei itumalo e tusa ai foi ma le faamoemoe i le Tulafono Tau Faaofi o le Faatatauina o Tupe Faaopopo (Nu. 2) 2014/2015 ma le Tulafono Tau Faaofi o le Faatatauina o Tupe 2015/2016.

E talitonu o lea ua maea ona e seu le lupemua masina pupula i lau faausugasega i le taeao ua sola aua le tatou vatapuia ma lo tatou Alii Faaola, ua maea foi ona e utupupuina fulu o segaula aua le mafua o lo o faalepa i le tapuaiga a lo tatou atunuu i ona tulaga faalupe. Ona i ai lea o le manatu o lenei itumalo, ia o le a seu le tuli i Puletuu i sa matou tala aua ou paia

maualuluga Samoa, aua ua faalava ma taoto i lagotonu le pa i Fualaga i le malae o le Ma, e le mafai e se poto po o se atamai ona ia toe atiati pe toe soloa, aua o le pa e mapue, o le pa na te atimau ma siisii maa ai tuua ua mavae, ona faapena lea ona mausali, ia ma tumau ai ou sa ma faiga e le toe avea.

A o lenei taeao na liugalua, ia ua faamalo ua afua ilao ua maua, malo le soifua laulelei i lau Afioga i le Fofoga Fetalai, le Afioga i le Palemia ma le Sui Palemia ma le aiga Kapeneta, faapea foi le Afioga i le Taitai o le Itu Agai ma le Sui Taitai mamalu i Minisita Lagolago ma sui usufono mamalu o le Palemene.

Lau Afioga i le Fofoga Fetalai, e muamua ona momoli atu le faafetai tele i lau Afioga i le Minisita mo Galuega, Felauaiga ma Atinae Eeseese ua vave ai ona faataunuu se talosaga a se tasi foi o nuu o lou itumalo o Gagaemauga Nu. 2 ona o le auala galue i Saleaula i Savaii, ia pe ou te taua foi o se auala e sosola mai ai i le Tsunami. E pau o lea lau Afioga i le Minisita e taua atu i le Nofoa, ia e valuvalusia pea aa o le fau i sou finagalo. E ui ua tulata ina maea lenei Paeaiga, ae ou te valuvalu atu pea ia aa o le fau, e te alofa i le auala lea o lo matou nuu i Salamumu i le agai i tai i Salamumutai. Mo le silafia foi e lau Afioga, e le o se auala galue lea auala o le auala o le tatou Malo.

E le gata i lena, o lo o i ai foi se atinae taua o le faletalimalo i tai ua leva ona saofaga ai lenei nuu i le tamaoiga o le tatou atunuu. Ae faamoemoe atu pea i lau Afioga, ou te le manao e tuu i le lagi, leaga e leai se konekarate fai auala a Iesu, ae tau ina ou faamanatu atu i lau Afioga, atonu e sau Solomona i le isi Paeaiga ona faataunuu lea o le vaega lea pei ona tau atu.

Lau Afioga i le Fofoga Fetalai, ona oo mai lea o se faamatalaga i le Tala o le Tupe, o au ou te fiafia tele ou te lauga i mea nei o Tala o le Tupe. Ae ua ou manatu o le a faataatia ese le vaega lea, e ui o se vaega e taua ia te au i tausaga uma lava, o lou fiafia ia e faitau. Aua o le upu moni lau Afioga i le Fofoga Fetalai, a ou lauga i figures o le Budget lea, lona uiga e sese lau lauga ona o le fesetai foi, ae fesetai feoloolo, e le laitiiti le tele ae feoloolo. Na ou faapea o le a oo mai se faasaoga ou te talanoa atu ai i estimates ia e aumai aua e base estimates ia i le actual period, tausaga ia ua tea. Ae ui i lea, e leai se mea o i ai i le tulaga lea, ae pau lava le fautuaga, tautuana e tapena lelei a tatou faamatalaga o lea e fia faafofoga le atunuu i le atoaga o galuega aemaise lava o mea tau tupe, ae le gata i lena, o lo o fia silafia foi lo outou alofaiva i lea tausaga ma lea tausaga.

Ona ou oo mai lea lau Afioga i le Fofoga Fetalai, se i amata atu lava se vaivaiga i le folasaga a le Afioga i le Palemia po o le theme o le Tala o le Tupe lenei. E fua le manao i seleni e mafai ona tatou maua. Lau afioga i le Fofoga Fetalai, faatoa ou faalogo lea i se folasaga faapea, faatoa ou faalogo lea i se folasaga, o le manaia ia o le folasaga. O se folasaga e fai ma le toa lau Afioga, o se folasaga ua fusia le loto i le alofa mutimutivale, ae tau manino mai ai ma tau ataata mai ai ua tau vaivai le loto, ua tau sola le faamoemoe. Malo faafetai, malo lava faafetai. Aua foi lau Afioga i le Fofoga Fetalai, o le tele o tausaga ua tuanai, o autu masani o folasaga a Minisita o Tupe sa aumai i luma o le Palemene e faapea, "E ui ina utiuti seleni ua tatou maua, ae tataua pea ona siitia tupe faaalu i atinae ina ia uunaia malos ai le tamaoiga o atunuu. O le fesili la; ua toe fua la e a i le taimi lenei? Faafetai ua tautino le solo a le tamaloa i le tulaga moni o lo o i ai mea tau tupe a le tatou atunuu.

FOFOGA FETALAI: Se i avatu le avanoa i le faauilavea a le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, na ou faapea e atamai le sui usufono o lo o lauga nei. A vaai i ai i le lautetele o upu, o lona uiga o upu, e aofia uma ai lava tatou grants mai fafo, e aofia ai ma tatou nonogatupe, e aofia uma ai lava mea e mafai ona oo i ai lo tatou malosi. A faitau la i lauga muamua ma le lauga lena, e leai lava ma se eseese. A o le faamanatuga, e faamanatu tonu mai lava ia i tatou, e le na o le manao, manao, manao, a ia tatou nonofo foi ma prioritise, aumai le manao i le mea e ave i ai le faamuamua. E faapena ona fai mea tau tupe.

A lea sa tatou faalogologo nei i le taeao i le isi manao, tufa atu pasi e faatietie ai fanau aoga alu atu ma penisini, avatu ma isi mea. E i ai le tiute o tatou, e i ai ma lo tatou sao. Ia o le a talafo uma mai lava i le Malo a o le sao faaopoopo. Aua a lafo mai i le Malo, o ai e faatupea? E toe liliu mai foi le Malo i tupe masani, lona uiga e siitia tatou lafoga, a o lea foi ua siitia lafoga i le Tala o le Tupe lenei, i faguinu faapea foi ma sikareti? O lea ua siitia. O le ala lena o le manatu, e le faapea o le talafo uma mai i le Malo, ae fuafua foi o tatou manao. Ia e ese la upu nei, se i uma a oulua talanoaga, fai ia uma. E tutusa lelei lava, ae o le mea lea e ave i ai le faataua, o le faamanatu mai ia i tatou, aumai na o mea tau ae soia le fai ma lafo mai i le Malo, lafo mai i le Malo mea uma lava. E i ai foi o tatou sao e tataua ona tatou faia. Lau Afioga i le Fofoga Fetalai, o le mea lena na ou fai atu ai, na ou faapea ua leva ona e malamalama. E le o suia upu, o la e tutusa lava upu ma le agaga o lea e faamanatu atu ai ia i tatou uma. Ae le faapea o lea e paleni pei o le mea na aumai faapea ua leai ni tupe i fafo, ua leai ni tatou nonogatupe, ona faatoa sao loa lea o le mea lena e te fai mai ai, pe a na faapea o lea e faalagolago lava na o tatou seleni tupe alu, e leai se faasiliga o tupe alu na i lo tupe maua.

Ia o le atoaga lena lau Afioga, a o lea lava e i ai le faasiliga o tupe alu na i lo tupe maua pei foi o le Tala o le Tupe o le tausaga lea, ona tala atu, ma ona tala atu seia tau lava i le 20 ma ona tupu tausaga talu ai e le o suia lava faaupuga. A e pei o le teuteuga foi lea o upu lena e pei ua e te i ai. 'Aua e te te i gofie. O le mea e igoa o le te i gofie, o le te i a le isi pe ma le fatu, ona te i lava lea ua maumau le ola i finauga le aoga.

FOFOGA FETALAI: Malo. Tulai mai le sui usufono e faaaau le saunoaga.

Tofa LEVAOPOLO TALATONU: Lau Afioga i le Fofoga Fetalai, o au na ou au tele i le faataatiaga mai le tausaga lea na tea nei. O le lelei foi lena o le tamaoiga o le matua tuu i luga o tupe faaalu. Na pau lava le mea na sasi, e le i lelei le prioritise ina o galuega e faaoga ai le....

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, ia manatua foi la mai le tausaga le la e tau mai i le taimi lenei, o lea ua amata ona faaiuiu le tele o galuega, le

taimi lea sa tele ai tatou mea faatamaia, e pei o le vaiaso talu ai lea foi sa tatala ai le aualatele lea e faitio ai isi, le aualatele lea na faataoto mai ina ua uma ona aafia le mata Aleipata i le Tsunami i le masina o Setema 2009.

O lea foi la ua amata ona faataoto nisi galuega tetele, e aofia ai talivai lea e faaalu atu i Vaisigano e aofia ai ma le suia atoa o le auala laupapa lea e i ai. A o lea ua faatino le isi auala lea sa faapea foi ona tagi mai ai Magiagi ma Moataa. E mafua mai i le a? E mafua mai i le Evani. O lea la ua faaiuiu isi galuega tetele pei foi o se aualatele i Siumu na faataina, o le mea lena o lea ua agai i ai tatou e faaiuiu galuega tetele ia, ma ua faapena ona alu ifo ai i lalo le tele o tatou galuega. A o lea foi ua faagasolo isi galuega fou, lea faatoa saina nei i le taeao le M.O.U ma le Malo o Iapani i le toe faaleleia o le vaega lea o le uafu i Matautu ua pala, aemaise ai le vaega lea e i tai toetiiti lava SAT\$70milion na fausia ai foi e Iapani i le 2002 ae USD\$30milion le vaega fou lea o le a toe faafou ma sainia ai le M.O.U. i le taeao nei. A o mea ia, o mea o lea e faagasolo lava i luma galuega, ae mo le tausaga lena o lea tatou agai atu i ai, o mea ia ua ave i ai le faamuamua. Ae leaga e te le i Minisita o Tupe, e te le malamalama i mea ia e faataatia atu.

FOFOGA FETALAI: Tulai mai le sui usufono e faaauau le saunoaga.

Tofa LEVAOPOLO TALATONU: Faafetai ua umi le faamalamalama ae le o talafeagai ma le mea lea ou te fai atu ai. E ui i lea lau Afioga i le Fofoga Fetalai, o le atugaluga lea ou te tilotilo i ai au i le Tala o le Tupe, ua pau i lalo tupe maua, ona o le tulaga ua tuutiitia a tatou tupe faameaalofa mai, tatou grants. O le mea lea sa avatu ai se matou fautuaga muamua i le Afioga i le Palemia.

FOFOGA FETALAI: Se i tulai mai le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e manino lelei le lauga na avatu. O le tele o isi tatou grant na aumai o le lagolago mai i mea sa faaleagaina e afa ma Tsunami. O lea la sa i ai le vaega na aumai foai, e i ai foi le vaega na aumai faa-nonogatupe. A o le foai foi la sa faavae i luga o le tualga foi lele ua oo tatou i luga o le tulaga ua maualuga tele aitalafu a o lea foi ua vaai mai latou i fafo o lea ua see ese tatou mai le tulaga lena, masalo o le a faaauau ai pea i le tulaga maualuga sa i ai. O lena e manino lava le faamatalaga na avatu, ma le isi mea o lea ua maea isi galuega tetele ia. E leai se galuega e uma ae o la e taatitia tupe. E faapena le mea, e i ai le upu foi lele, "You don't have your piece of cake and eat it too." A e fia tausamia lau fasikeke, e uma loa lava ona tausami leai loa se fasikeke. Ae le faapea o le tausami lava ae vaai atu lava o la e taatia mai lava le fasikeke i luma. E faapena le mea, a aumai loa tupe faaalu ona leai loa lea.

FOFOGA FETALAI: Ia, e manatu ua malamalama lea mataupu Levaopolo. E fautuaina le sui usufono e faasolo lau lauga, o lena e manaia le faasologa maiga i alu ai lou taimi.

Tofa LEVAOPOLO TALATONU: E le mafai ona uma le keke pe afai e mata le keke. O le ala tonu lena na ou fai atu ai, na matou fautuaina ai lau Afioga i le Palemia ma le Malo i le tatou mei atu i luga o Malo Atiae le LDC, silasila se i lava tapena, a o lea la ua aliali mai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: O le mea e fia faasao lau Afioga i le Fofoga Fetalai, e le pule tatou i le mea lena. Ua leva ona ou faamatala atu ae o lena e te le o malamalama. E le pule tatou e le o se tatou faatulagaga na tatou nonofo ma fai. O le faatulagaga a Malo Aafaatasi. E pule ai lava latou, e omai ma malaga mai ma feoai solo ma vaai i fuainumera o tupe alu ma tupe maua ma grants, ona nonofo loa lea o latou ma faatulaga. Faatulaga loa lea e latou le tulaga ua oo i ai lo tatou tamaoia. O le mea lea na avatu o le tupe maua a le atunuu atoa e \$2pilionia i le tausaga fou po o le GDP. O le tupe tuufaatasi lena a le atunuu atoa, ua matua ova mamao atu ma le tulaga e tatau ona tatou i ai mo se atunuu mativa. E le o toe mativa elo la Samoa. O lea ua oo i le tulaga maua, e le mafai ai ona toe aumaia ni fesoasoani faapea. Ua leva ona faamatala atu ia mea a o lena e te le o malamalama i ai – O le faaiuga lava lena fai toatasi e le Malo Aafaatasi o lo o sau ai le tele o fesoasoani.

FOFOGA FETALAI: Tulai mai le sui usufono mo Gagaemauga Nu.2.

Tofa LEVAOPOLO TALATONU: Faafetai. O le ala tonu lena, e le o se mea leaga le tatou oo i le tulaga lea ua tatou i ai. Ma o le silasila a atunuu ia sa masani ona maua mai ai a tatou meaalofa, ua tatou lava tapena lelei ua lava ma totoa a tatou seleni, a o lea ua toe oi mai i le folasaga, e fua le manao i le seleni ua tatou maua. O lea la ua oi.

FOFOGA FETALAI: Ia, ou te manatu... Se i tulai atu le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea tatou te taamilomilo lava i le mea e tasi. Ua uma ona tali mea uma ia. O le mea lea ua tulai mai, e i ai le tatou Tulafono foi lele mo manatu ua too repetitive. Ua leai nisi mea fou e aumaia. Afai e leai se mea e fia lauga ai, o le a lava le mea e saga sasa ai le solofanua ua mate? O lea lava tatou te taamilomilo i le mea e tasi, ua uma foi ona faamalamalama atu, po o lou le fia malamalama, o le mea lava lena a oe, ae leai se isi faamalamalama i tua atu o le faamalamalamaga ua avatu.

FOFOGA FETALAI: O le ala foi lea o lou taumafai atu Levaopolo i le taimi ua sola, silasila foi o lea e maitau le Nofoa ua faalua faatolu o taumafai atu le Malo e tali atu. O le mea foi e fai i a tatou upu masani, a tagatasi loa aga a tautai ua aefua le faiva. A ilo foi faiva ua tuavao ua faapena foi le seuga. E fautua atu, agai i se isi mea fou o lea ua manino ma malamalama le tulaga lea e te saunoa mai ai. Ae agai i tulaga o lou itumalo o lea toetiiti uma lou taimi, e fautua atu.

Tofa LEVAOPOLO TALATONU: Malo faafetai. Ia leaga o la e faafofoga mai le atunuu leaga o le major problem lea o le pau o tupe, ae o le a ou mei la i le isi vaega lea lau Afioga i le Fofoga Fetalai.

Na ou oo mai lea i le faatauaina o le faafaigaluegaina o tatou tagata. Masalo sa taua e nisi sui usufono, ae ese la le angle lea ne i te i ua toe tulai mai le Afioga i le Palemia i le tulaga o stats ia na avatu, o stats mo tagata e totoi NPF, a o le stats lea ou te alu atu ai, o le overall atoa lava o le atunuu, ne i te i ua tulai mai. A silasila lau Afioga i le Fofoga Fetalai i le tusigaigoa lea na fai i le 2011 aua o le latest lena a tatou, e masalo mai le 188,000 tagata o le population, e 112,000 tagata e leai ni income, amata mai le pepe e oo i tagata e le faigaluega. E 70%... O lea ou te talanoa atu i le...

FOFOGA FETALAI: Malie le sui usufono se i tulai mai le faauilavea a le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le itu lea i tagata faigaluega, o lea e i ai le census o tagata o faigaluega. Ae manatua foi o le tele o tatou e lavea i le vaega foi lea e le o faamaumuina lea na saunoa atu ai le Afioga i le Sui Palemia. O tagata nei e ola lava i luga o latou taumafaiga i faatoaga. O le ala lena a oo loa ina talanoa economists i mea nei o unemployment fai mai latou e leai ni unemployment i atunuu nei pei o tatou, aua foi o la e tele le laueleele e galulue ai. A o lea foi ua uma ona saunoa atu le Sui Palemia i le tele o avanoa ia e i ai i le tulaga mo le agai i le lumanai. Lea sa tatou pisapisao i le leai o ni maketi. Na o le matala mai lava o le maketi o le talo, o le a le mea lea e tupu? E le o taitai lava le talo lea e toto. E le o taitai lava. A ua matua moomia ni talo. A o le tulaga foi lena o lea e tupu atili le tatou tamaoiga i mea o tagata asiasi maimoa mai. E taamilo atu i tua, faatau niu, faatau papakiu. E le o faamaumuina. E le o faamaumuina i lalo mea nei o auaunaga nei, ma o lo o tupu pea. O vaafagota lea e omai mai fafo ma a latou ia e leai o le kamupani Saina, e tele tupe lea e maua e o tatou tagata i le faatauina o meaai, o meamata, o ia ma isi mea tuuapa e faaaoga e latou i luga o vaa.

E tele la mea ia e maua e tatou, e oo foi i a tatou taumafaiga ia e fai i tagata e ave i fafo e faafaigaluega ai i Niu Sila ma Ausetalia i faatoaga. O le tele ia o galuega ia e maua e o tatou tagata, a o lea foi ua taoto le tatou Tulafono lea sa tatou pisapisao ai, sa outou tetee foi i ai. O le mea lea ua aliali mai nei, ua le iloa le mea o le a fai. A fai atu le mea e maua ai galuega ae tetee. Ona outou tutu mai foi lea faapea mai e le lava galuega, a o lea e fai le galuega a le Malo i le sailiga o galuega mo tatou tagata. Sa ou talanoa i ai i le aso o le Fua, i le aoga o le mea lenei o le tatou o e sisi le fua, se i faafoleni ai a tatou fanau ma faamanatu mai ai pea i le Malo le taua o fuafuaga e tataua ona faataatia mo galuega mo fanau. Na o le faitio, faitio, faitio. Na pau lava lena o le mea lea e fai e outou. A o lea e galue le Malo mo le sailiga o galuega mo tatou fanau.

Lau Afioga i le Fofoga Fetalai, o le mea taua lava lena. E oo foi la i tulaga ia o tatou poloketi nei e faagasolo. O lea ou te maitau o se taimi ua tailua taitolu galuega ua faamatuu atu i contractors. Ae le mafai ona fai. Na o le tasi galuega se i uma ona omai lea fai isi. Ua amata ona oo tatou i le tulaga foi lea ua tele a tatou galuega e fia fai, ae le lava tagata e faagaoioia, tagata e i ai tomai faapitoa. O le ala foi la lena o lea tatou te o ai i fafo ma aumai tagata

mai fafo e faatelevave ai le tamaoaiga o le atunuu lenei. E oo lava foi i a tatou tagata mamai. O lea e talau i fafo tatou tagata e togafiti ai. Ae o lea ua uma le falemai fou ma faataatia polokalame mo le suia lea ina ia togafitia lava i Samoa nei tulou tagata mamai. O le suiga tele lava ua ausia o le faatu o le tatou falemai i Samoa nei e togafiti ai lava latou ua afaina o latou fatugao i totonu o Samoa.

Lau Afioga i le Fofoga Fetalai, e ala ona ou taumafai e laulau atu mea na. I le tele o nei mea e fai, ae tutu ae lava lauga mai fai mai e le o lava le a le o lava le a. A o a nei mea e fai? Na o le tafaovale lava le mea lea e fai.

Afioga Hon Palusalue Faapo II: Lau Afioga i le Fofoga Fetalai, leaga e matuia tuuaiga ia e fai mai i le Itu lenei, fai mai e faitio, e tetee. Ia silasila lau Afioga i le Palemia, o le matua lagolago atu ina ia maua galuega a o tatou tagata. E leai lava se faitio leai se tetee. E faatupu manatu ia oe, leaga o lea e oi le atunuu e leai ni galuega.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: O le mea e tatau ona e faia o le aoai o sui usufono o lau Vaega.

Afioga Hon Palusalue Faapo II: O lea matou te lagolago atu, a o le faalavelave e sese la outou mea lena e fai.

FOFOGA FETALAI: O lea ua maua atu Palusalue. Tulai mai le Afioga i le Minisita mo Faatoaga.

Afioga Hon Le Mamea Lemalu Su'a Leatuavao Tuiletufuga Ropati Mualia (Minisita mo Faatoaga ma le Faleoloa o Faatoaga): Lau Afioga i le Fofoga Fetalai, semeamanu lava o lea e saunoa le sui usufono i le fia maua o ni galuega a o tatou tagata, o tatou vaa foi nei e faasalalau e 88 galuega ae le o maua nisi. O lea e faasalalau e fia maua ni seila e o e fagogota a o au e o atu o tatou tagata ae fai atu i ai pe fia le umi e o ai ae fai mai kapeteni o vaa o se lua i le tolu masina, a o la e mananao na o se lua lava vaiaso e o ai toe omai. Ia, o le mea lea e tupu, ua lau mai tagata faigaluega i Kiripati ma Solomona ma Tuvalu, e faigaluega i luga o tatou vaa ia e aumai nei i le taimi lenei. A i ai la nisi o silafia e outou e faigaluega i sia mea e maua ai galuega, ia o la e ua ou tau atu, semeamanu o talanoa galuega. Ma lou faaaloalo lava.

FOFOGA FETALAI: Ia, tulai mai Levaopolo e faaauau le saunoaga.

Tofa LEVAOPOLO TALATONU: Faafetai i lau Afioga. O le mea muamua ae le i faia sau tala, e aoai e Saleaula le aualii uma ia e toalua, e le aoaia e se isi Saleaula i le mea lea. A o le aitia lea o le faletalimalo mo tagata asiasi maimoa mai fafo, se ua pasia foi, ua leva ona tatou taumafai e le o masau le alu. A na onosai mai se i ou tago e avatu le isi aitia fou lea i lau Afioga i le Palemia ona e talitonu lea i le masau o le alu.

FOFOGA FETALAI: Toe lima minute o le sui usufono.

Tofa LEVAOPOLO TALATONU: Lau Afioga i le Fofoga Fetalai, o le upu moni lava, e le mafai le mafai ona ausia e le tatou Malo se tamaoaiga

lelei pe a tatou le o e matua faalelei le tamaoaiga o sitiseni taitasi o le atunuu lenei. E faapefea ona fai? O le tulaga lena pei ona ou fai atu, pei o le tupe a le pepe. O isi atunuu ua maua lava le tupe a le pepe i le taimi e fanau ai mo le penefiti. A o tatou, e le o mafai ona tatou maua le mea lena.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, se ua ta nofo nofo ota mafaufau po o le a le aitia e aumai nei, se matua faavalevatea tele lenei aitia. O le matua faavalevatea lava. O le mea la lea na ou fai atu ai, o faipule e omai i inei fai saunoaga faavalevatea, irresponsible. O le mea e tataua ona tatou faia, o le uunai o le atunuu lenei e galulue. A o le a le mea lea e fai? O manatu e faanofonofa ai le atunuu aua le galulue. O mea na e fai e atunuu la e i o. E eli ai le suauu, ioe. O i ai ni tatou suauu? Na o le suauu popo, e te alu e faatau le fia selau popo ae aumai lau tupe e le lava. Matua vaivai tele lenei manatu e aumai.

O le mea lenei o tagata tafafao maimoa mai fafo, masalo e uma ane le tausaga lenei ua atoa le \$400milionia e maua mai ai a Samoa o le a sili atu nai lo se isi lava atinae o lo o fai nei, pei o lea e te saunoa mai ai i tagata asiasi maimoa mai, ua tiga taliga i le avatu soo avatu soo. Ua tataua ona avatu soo, leaga o atinae ia e aofia ai e le gata o vaalele, o faleaiga, o faletalimalo ma le anoano, e aofia ai foi ma taaloga ia e fai nei. O le ala foi lena na toso mai ai e le Iuni Lakapi le taaloga lea ma le All Blacks i inei aua foi e aumai uma ai ma Niu Sila e faamatamata ai. Ia o lea ua tutumu tatou faletalimalo. E le gata la i lea, a o lea o le a omai ai ma le faalapopotoga atoa lava a le aufai apu, lea o le a omai e fai i nei le latou fonofono ma matamata ai e tapuai le latou au, ma talanoa ai loa ma le Malo e toe avatu se isi faaopoopoga o tatou tagata. E tasi le mea ae tele mea ia ua mailei mai i inei e fanau mai ai isi mea fou mo le tatou atunuu. Matua vaivai tele nei mea e aumai e Saleaula.

Tofa LEVAOPOLO TALATONU: Lau Afioga i le Fofoga Fetalai, a na e onosai foi lea ona e toe faafofoga mai lea i le avatuga o mea. E leaga o lena ua e agai mai ae le i avatua se aitia ia oe, ae se i ou mafaufau pe avatu le aitia lea ia oe.

Lau Afioga i le Fofoga Fetalai, na taua e se tasi o sui usufono le toaiva o tagata o le aiga ae toatasi le tagata faigaluega. o le mea lena ua leva ona avatu i le tou Faigamalo e matua uunai malosi mai kamupani e faia fale gaosi mea ona ave lea faatutu i itumalo. Ou te iloaina lelei lava le mea lena e tou te fefefe i ai, tou te fefefe i le aumai i lalo o rate o tagata faigaluega i le mea lea e manaomia e kamupani. A o lea ua ou fai atu, e sili le iai i lo le leai.

FOFOGA FETALAI: Malie le sui usufono se i tuu atu le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e tasi lea mea faavalevatea e fai mai ai le sui usufono. E le pule tatou i kamupani e aumai i Samoa, e le pule tatou. Na o le pau o le mea, o faamanuiaga e ave i ai, ona faitalia lea o latou ma fai le latou faaiuga. Ae a le Tulafono taua lea sa faatulai atu nei ae e tetee, o oe le isi tagata sa matua tetee lava i le Tulafono, le Tulafono lena lea na taumafai ai e toso mai ni Yazaki se 100. E oo mai i le taimi lenei, o la e ua

tapenapena le Yazaki e toe foi i fafo ae o la e foi ua taumafai e faatalatalanoa ma le Malo pe i ai se isi mea e mafai ai ona toe faaauau latou iinei ona o galuega lava ia tau uaea, e sili atu ona taugofie pe a o i isi atunuu. O le mea o le tagata faipisinisi, e leai se pisinisi faavalevaea e vaai atu lava e gau ae alu i le atunuu e gau ai.

O le tali sao lava lena, e te fiu lava e faatulaga atu mea o faatosina, mea muamua, e tele mea e gaosi ai mea e le o maua iinei. Lona uiga e sau le vaa mai Saina e lau mai mea e gaosi ai mea ona toe ave lea i Saina. E matua faigata lava, e faaluaina ona totogi le feaveaiga. E tau tilotilo la i atinae pei o tagata tafafao maimoa mai e faigofie i tagata ona tauave e aunoa ma se tau tele e mafai ai ona faaauau pea i Samoa nei.

Lau Afioga i le Fofoga Fetalai, o le ala lena o lea ou te fai atu ai, e leai ni faipisinisi faavalevaea e omai i Samoa se i vagana ua lava ma tele atu mea o faatosina mai ai. O le mea lena e i ai le tatou Tulafono lena sa taumafai nei mo le faamoemoe fou i le faatosina. O le isi ituaiga faatosina e tosina mai ai isi foi ituaiga aufaipisinisi ae le soona omai la, e omai e omai pei e fesoasoani i mea o ituaiga pisinisi e omai ai tagata asiasi maimoa mai i Samoa nei, ituaiga pisinisi faapena tai pei o ni hotel, ia ma ituaiga gaoioiga eseese e fiafia i ai ia tagata asiasi maimoa mai iinei e fiafia e o e faaauau lo latou taimi.

Lau Afioga i le Fofoga Fetalai o le tulaga lena, e leai e fuafua foi i le aufaipisinisi mai fafo le tatau ma le le tatau e omai ai. O lea foi la na ala ai pei o se tala foi lele tou te faamuamu i ai, a o le mea moni lava, o le uafu lea i Savaii ua tatala, o lea la na afea e isi vaa, o isi foi vaa na afea o vaa o tagata asiasi maimoa mai, e i ai foi isi vaa o tagata asiasi maimoa mai e mafai ona afea o i Asau, ae faia e le Malo mea ia ona lafo loa lea i le aufaipisinisi e gaoioi loa latou, o lona uiga la, afai lava la e le fia omai vaa e afe i Savaii ae omai i i, e omai lava i i, iinei i le mea e aupito sili ona toatele atu ai tagata e faatauina a latou mea, o le mea lena e ala ai ona taumafai le Malo e fai le isi aai tele i Savaii i Salelologa, se i faatosina atu ai outou nei mai Savaii, e tou te o i Savaii, e atiae Savaii, ae le o le tumutumu iinei ma atili ai ona omai pisinisi mai fafo ma omai iinei, e fia o pisinisi i le mea o tumutumu ai tagata, afai lava o le tou lauga mo Savaii ae tou te le o i Savaii ae na o lo outou nofonono iinei, ia o le talapepelo le mea lena.

FOFOGA FETALAI: Ia faaiu maia toe lua minute le sui usufono mo Gagaemauga Nu. 2, faaiu maia le saunoaga.

Tofa LEVAOPOLO TALATONU: Lau Afioga i le Fofoga Fetalai, a e, o lea ua te i ua e nofo ma tutuli matou i Savaii, a o le matou motu foi lenei, ia ua outou faafofoga mai Savaii ua le o toe moomia outou e le Palemia iinei i Tumua, ae lau Afioga ou te le tetee i le Tulafono lena o au le isi tagata sa lagolago i le Tulafono, e avatu la lau faaitaiga, pe a faapea e aumai la faatu i i i Safata e avatu ia le mea lena o se Factory, a, o le taimi lenei a toaiva le aiga ae faigaluega le toatasi, e \$2.60sene i le itula o lona uiga e na o le \$100 le mea e maua i le vaiaso, ae a aumai e \$1.60sene i le itula ae faigaluega uma le toaiva, e \$600 le tupe a le aiga lea e maua, se i vaai i le auala lena ua ou fai atu ai, e a ua e maua mai le auala lena?

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e le mafai ona avatua se tagata e le talafeagai ma le galuega, ua outou faafogafoga i le mea lea na saunoa i ai le Afioga i le Minisita mo Faatoaga ma Faigafaiva, e ese lava ituaiga galuega ma mea e moomia ai le galuega la lea o le fagota, e moomia lou malaga ai ma e nofonofa i fafo. E faapefea ona aumai e le aufaipisinisi nei mai fafo le avanoa i o tatou tagata pe afai e na o le tolu aso e fia alu ai i fafo a o le aso fa ua fia foi mai e momoe ma le ava? O le mea lena o lea e tupu nei. Na o isi i Niu Sila i le mea lea o le tauga-apu, e atoa le vaiaso ae toe omai isi, se i vaai i le faatautala, ae fesili atu ai po o le a le mea ua toe foi mai ai fai mai ua manatu le fanau. E talanoa atu i le fanau ma le toalua, ae fai mai e leai e pepelo ua manatu mai i lo matou tina. Ia o mea ia e tutupu i lo tatou olaga. E amuia oe e le o iinei lou toalua o la e i fafo. Ae ou te le o iloa po o e amiotonu i lau nofo lea e te nofo ai iinei, e le iloa po o le mea lena e te fiafia ai lava e faanofonofa si fafine i fafo.

Lau Afioga i le Fofoga Fetalai, e fia umi lava leaga o lea ua ou vaai atu ua toe 30 sekone le taimi o le sui usufono.

FOFOGA FETALAI: Faaiu mai le sui usufono, e fautuaina le sui usufono mamalu e faaiu mai, e maua lou avanoa i tatou Mea Taitasi.

Tofa LEVAOPOLO TALATONU: Lau Afioga i le Fofoga Fetalai, ua o si o matou aiga e tau sue se manuia i o i le pologa iinei i lenei atunuu – ma aua e te talanoa mai ae pei e te faasepasepa i le sui usufono mo Falealupo, o le mea lena e le....pei o le tulaga lena sa tau avatu ai se lagona, aua e sili atu lea i lo le sau o le tagata faigaluega e toatasi ae kirikiti, volipolo le isi vaega, a, ia ae momoe le isi vaega i le ao atoa ma le po, ona tei lava lea ua tumutumu uta i le fale failele i le mea lea, ae le o omai e atiae faatasi se aiga se toatasi, a?

Lau Afioga i le Fofoga Fetalai, pe ua uma lea, aua o lea e....

FOFOGA FETALAI: Ioe, malie ia e faaiu mai le saunoaga ua maea lou taimi.

Tofa LEVAOPOLO TALATONU: E toetiiti lava uma, ae lelei ua lava lea lauga, faafetai tele lava i lau Afioga mo le avanoa, e faafetai atu foi i lau Afioga i le Palemia i lou tautoai mai, faafetai.

FOFOGA FETALAI: Malo, e faamalo atu saunoa i le sui usufono mamalu, e manatu foi o lea e tou te faalele ae maitau le atunuu, e tatalo atu pea i sui usufono mamalu e le i saunoa, ou te manatu ua maea ona asaasa le ogasami ua uma ona tatou folau ai i aso nei e tolu, e tatau foi ona tuutuu lalata ia tuleiga ma saunoaga ina ia faafaigofie le galuega.

Ua faamalamalama faalua, faatolu, faafa nisi o mataupu na taua e nisi o sui usufono ua maea atu i le aso, e le tau aoaia e Laupua Tamafaiga i le paia ma le mamalu o le tatou Maota, o lo o i ina le uta a le faimea, ae tatou o ia e tau na o le pua e ula, tatou oto le lauava mumua i nisi o mataupu e le taugofie i le tatou Tala o le Tupe lea tatou te agai i ai, ina ne i meaane ua faaalu lo tatou taimi ae le tua.

O lo o i ai le avanoa i sui usufono e fia saunoa, o lo o lava pea lo tatou taimi ae le i tuu atu le avanoa i le Afioga i le Palemia mo le tatou lafo e lelei foi le amata nei, ia ona faauma lea nanei, o lea e maua le avanoa taua.

Tulai mai le sui usufono mo Samoa Aoa, masalo o le taimi mulimuli lenei o le a faalupe ai oe o le sui usufono mo Samoa Aoa e le o toe mamao ae tulai mai o le a sui lou faalupega, tulai mai le sui usufono mo le Palota Taitoatasi, Afioga Maualaivao Pat Ah Him.

Afioga MAUALAIVAO PAT AH HIM (Palota Taitoatasi): Faamalo faafetai i lau Afioga i le Fofoga Fetalai, o le mea lea sa ou popole ai e fia faalogologo po o le a tonu lava le itumalo, aua o lea ua tolu ou itumalo i lenei Paeaiga, o le itumalo muamua o Samoa Aoa, ia lona lua o Tagata Palota Taitoatasi, o lea foi ua ou oo i le oooga o faigamea o Itumalo o Nuu Tu Taulaga, ia ae faafetai, faafetai i le agalelei o le Atua ua faapena ona aulia mai e le mamalu o le Palemene o Samoa lenei itula o le aso, ua mafai ona tatou....faapena foi le tapuaiga i Lana Afioga Mamalu, O Le Ao o le Malo faapea foi le Masiofo, faapea foi le Sui o le Fono a Sui Tofia, ae tainane foi le loaloa o si tatou atunuu i so o se Ekalesia Kerisiano, e faapena foi i tina ma tama matutua aemaise o alo ma fanau, ae faapea foi le tapuaiga isi ou itumalo lo ma itumalo ma se tasi o sui usufono mo Palota Taitoatasi, Susuga Hon Papaliitele Niko Lee Hang.

O lenei itula e moni ai lau saunoaga lau Afioga i le Fofoga Fetalai, ua tele nisi mataupu ua maea ona tolaulau ma faapena foi ia lagona o sui usufono o le tatou Palemene – ma ou te fiafia e tulai atu ma le faaaloalo e avatu foi so matou lagona i le Tala o le Tupe ua faapena ua faataatia nei i lumamea. Ou te faafetai atu i le Afioga i le Minisita o Tupe, faamalo faafetai. O le matou foi maitau ia ua fai ma le fuafua, fai ma le faatatau lenei foi Tala, ua maea foi ona faaleleia nisi vaega uma o le tele o le tatou atunuu, o le matou vaai, faamalo le faatoatoa ma le taulai agai i luma e manuia ai Samoa.

I le matou maitau atu i lenei taimi, ia e tasi lava sina...e i ai foi mea sa moomia e lo matou itumalo, aemaise lava faafetai i nisi o sui usufono sa laga foi ia faaleleia o auala, o alavai o mea faapena i totonu o le talafatai o Apia, e taua lea. Ae ou te talitonu foi lau Afioga, e muamua ona ou talosagaina lau Afioga i le Minisita mo Galuega, Felauaiga ma Atinae Esee a le Malo, e talitonu lava o lo o i ai ni a matou talosaga o lo o taoto atu i ina, e uiga i auala.

O auala ia ou te talosaga ai, e le o ni auala galue uumi lava pe tai fia ni latou maila, a o auala nei pe tai 5futu auala ia na ou talosaga mai lava i lou oo mai, ia o lea lava e talosaga, ou te talitonu, o auala foi nei e nonofo ai ia tagata le tele o tagata.....

FOFOGA FETALAI: Ou te faamalulu atu i le sui usufono mamalu, leaga o le tatou Maota lenei o le Maota o mea tautino, ina ne i meaane ua ou tapa le tai 5futu auala ia na....ae sili le faamanino lelei o lea foi e faafofoga le Afioga i le.....ne i taitaiseseina le faafofoga a le atunuu.

Susuga MAUALAIVAO PAT AH HIM: Ia ua sese la au i le vavao lea sa fai nei i auala galue, leai e le tai 5futu, masalo po le tai 500mita se mea faapena, ma le faaaloalo ae....

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai....

FOFOGA FETALAI: Malie le sui usufono, se i avatu le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Ona o lea sa e saunoa sao lava i le faalupega o Samoa atoa, o lona uiga a tau loa Samoa atoa e tasi la lea sui usufono ua ova le tele o mea ua fai i ai, e mai lava i Savaii e tau i Aleipata o mea uma lava mo le pale laei o sui usufono ia e toalua, o lona uiga e le tataua ona toe faia se isi mea ua fai uma lava mea e mananao i ai, i lau mataua atu lea i lou faalupega ma o la foi e ioe mai o sui usufono o Samoa atoa.

FOFOGA FETALAI: Ia e faamalulu atu le sui usufono, o le folasaga lea na ou avatua, o le taimi mulimuli lenei leaga o lea ua pasi le Tulafono, a pasi loa le Tulafono, o Nuu Tu Taulaga i le Faasamoa lena, ae a Faaperetania o le Town Area, ia.....

Afioga MAUALAIVAO PAT AH HIM: Faamalo faafetai, ia e moni le saunoaga a le Afioga i le Taitai o le tatou Malo, lau Afioga i le Fofoga Fetalai e moni le saunoaga, o mea uma lava e faatino i le atunuu lenei, e tatou te opogi ma tatou iā faatasi, o mea e lelei ai le atunuu atoa, ae na o nai mea lava ia i le talafatai i nuu tau latalata mai i le taulaga tai pei....lau Afioga i le Minisita mo Galuega, Felauaiga ma Atinae Eseeese, e momoli atu lau faafetai ona o lea ua ou faalogo o le a fai le auala foi lea i tafatafa, tulou lava, i le pamu lea i Pesega i le agai i tai, ua uma ona matou faalogo ua uma ona talanoa mai nisi o nuu na o Vaitoloa, o le a fai le auala, masalo o lena e i ai le paketi i ina i le Tala o le Tupe e faatino ai lea auala.

Ou te tatalo atu ma le faaaloalo, faatino ina ia mafai ona nofoia lelei e tagata i lea vaega o le auala.

Ma e faafetai atu i lau Afioga i le Fofoga Fetalai, e moni le saunoaga, o lo o faafogafoga mai lo matou itumalo o Tagata Palota Taitoatasi, e talitonu o lea ua nofofale ia Satuiamaa le agaga o le tatou Malo, ua suia nei le igoa o le tatou itumalo o Tagata Palota Taitoatasi i le Itumalo o Nuu Tu Taulaga – ma ou te talitonu o le mea e sili ona taua i la outou faafogafoga mai sui usufono mamalu o Tagata Palota Taitoatasi, e le o faatamala ia le Tulafono e aveese tatou ma le agai mai i nuu tu taulaga itumalo, o lea lava tatou te omai, tusa o le tatou malaga foi lele sa taitai e Mose le Nuu o le Atua o lea ua oo mai faaigoa i le mea lea e i ai le susu ma le meli ma le tamaoiga o le atunuu, lea ua faaigoa ai tatou, o le Itumalo o Nuu Tu Taulaga. Ma i lenei foi taimi e momoli atu ai lau faafetai, faafetai i e o lo o i ai i totonu o lenei itumalo ua maea atu ona faaigoa o Palota o Tagata Taitoatasi, ae o lea ua tatou omai o Itumalo o Nuu Tu Taulaga. Sa saunoa nisi sui usufono i le faaleleia o mea i nuu tu taulaga, i lau vaavaai na amata loa ona....o le aso o lea na amata ai ona lesitala ia sui o itumalo o nuu tu taulaga. E muamua lava lau faafetai, faafetai tele lava i le Taitaifono o le Komiti lea a matou sa pasiaina lenei Tulafono, ou te lagolagoina ma le faafetai ia tuaoi lea ua tulai mai, ioe, ua lavea ai agai i nuu ia e i ai Vaitele – ma e itiiti mea sa ou faalogo i ai i mea ua ou vaaia. Sa ou asiasi i afioaga uma nei, ma e faafetai o la ua i ai auala, a o lau vaavaai e

tatau ona faaleleia – ma e ou te talitonu foi, ua tele lava le itumalo, ou te talosagaina ai i mea tau galuega, e tasi lea mea sa ou maitaua, lau Afioga i le Minisita mo Leipa ma.....

Tofa Lealailepule Rimoni Aiafi: Lau Afioga i le Fofoga Fetalai, ona o lea sa taua Vaitele. Vaitele is my village, i totonu o lou itumalo, ne i te i ua tatou polokiki ai i le mea lea, ae tele le afaina. O la e ua saunoa mai e moni o la e i ai auala ae fia faaleleia. O lau fesili la i le Afioga i le sui usufono mamalu, o fea tonu lava o Vaitele e i ai auala ia e te saunoa i ai? O auala o Vaitele e te alu i le wheel chair, e faata atoa. Toe lava o auala savali e le i faataina. O galuega nei sa feagai ma matou faasolo atu i uta i Falelauniu alu agai i Toamua. A e savali foi i luga i le malae taalo... O mea uma lava nei sa ou faia. O le mea lea ou te fautua atu ai i le sui usufono mamalu, aloaloese mai le mea lea, aua e te oo i vaega e pei ona e saunoa i ai. O au na ou tau alofa i ai, a o nei lava i le aso lenei, se i ou tilotilo i ai. Ma le faaaloalo lava.

FOFOGA FETALAI: Ia, aua ia le... Ou te manatu Maualaivao ona o lea ua tatou tulalata i le taimi malolo. O le a ou avatua uma le avanoa, aua e te atugalu o lea ou te maitauina lau saunoaga, o lena e general le faasologa o lau mataupu, e te le o taua pe pitotasi se itumalo po o se nuu e i ai auala ia. A o lou tiute leaga o lea ua ilovea ma iloa taiao i le mea o le a agai i ai le faautautaga lau Afioga, o lena e sagatonu lau lauga.

Ou te manatu le tatou Maota o lea ua tatou tulalata i le tatou taimi malolo. Ae tatou te le i malolo o le a avatu le avanoa i le afioga i le Palemia mo le tatou lafo.

LAFO MO LE SUIA O ITULA FONO

Susuga Hon TUILAEPA FATIALOFA AUELUA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faataatiaese Tulafono Tumau 31(1) e avanoa ai le suia o tatou itula Fono i itula nei; 9:00 i le taeao i le 1:00 i le aoauli ona malolo ai lea toe amata i le 3:00 faaii i le 7:00.*

Faaluaina e le Sui Palemia, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo le Soifua Maloloina.

Na faamaonia le lafo.

FOFOGA FETALAI: E momoli atu le faafetai tele i le tatou Maota i lenei vaega o le aso. E talitonu o lea ua faatuina le tatou lafo e le Afioga i le Palemia, o le agaga autu ia papaaveloa le tatou galuega. O le ala foi lea ou te tatalo atu i le paia ma le mamalu o le tatou Maota Fono i le augani atu pea i le tulaga o tuleiga ma saunoaga ina ia agai tonu i le mea o lo o tatalo atu ai i le tatou Tala o le Tupe. O lea foi e faataatia le tatou alafua fou lea, tautuana sui usufono mamalu ia tautuana le tatou taimi.

E manatu foi o lo o tele ma anoanoai tiute o le tatou Malo e le i faatinoa ae le gata foi i lea o tiute o Ofisa Sili o Pulega o lo o tatou faatasi i le tatou Fono,

e faataua lava le agai o tatou Fono ina ia tau tupe o taulafoga ma faataua a tatou Fonotaga. E tatalo atu ai mo nisi o sui usufono e le i saunoa i le tatou Tulafono Autu tatou te toe Fono i le itula e 3:00 seia aulia le itula e 7:00 ina ia agai mai e faaaoga le tatou taimi, aemaise le tulaga o le folasia o saunoaga.

O lo o tapena le tatou taumafataga e le Ofisa o le Fono e tali lelei ai la outou sua ona agai ai lea mo se faiga malologa, ona tatou toe taliu mai ai lea tatou te toe faatasi i le itula e 3:00 i le afiafi nei lava.

Na faataatiaese Taualumaga a le Fono Aoa o le itula e 1:00 i le aoauli.